


文苑英華

八



文 文

貢

雜奏狀

陳情

文苑英華卷第六百四十一

進貢中

狀十四

降誕日進物狀十五首

進農書狀一首

進碑文狀二首

進詩狀一首

進新舊文十卷狀一首

進畫馬屏風狀一首

進東封圖狀一首

進西北邊圖經狀一首

進哀冊文狀二首

降誕日進光明砂等狀二首

呂頌

右臣伏以大電遶樞千年感聖神光照室六合歸尊恭惟
降誕之辰是啓乾坤之祚普天稱慶率土同歡仰舜日而
徘徊望堯雲而抃躍前件光明砂等金丹上品著在仙經
願因一作延不朽之姿永固長生之壽

二

右臣伏以上玄降聖之時皇帝出震之日天垂景曜遶北
斗以呈祥人竭歡心願南山而為壽前件光明砂丹石等
管內所出服餌所尚生依山谷誠有驗於仙方真自靈夷
幸得充於御府臣藩守有限不獲稱慶闕庭

降誕日進物狀

裴次元

右臣伏以搖光之祥貫月於佳夕遶樞之感降聖於良辰
歡浹寰瀛慶延寶祚百靈効祉固增壽於南山萬國一心
皆貢珍於北闕臣謬膺廉問分鎮甌閩當朝案之稱觴身
居遐遠望長安而瞻日戀積心魂前件女口及銀器衣箱
等稽禹貢之文敢遵任土比野芥一作芥之獻空願竭心冀因
此而展誠豈以菲而廢禮輕瀆旒宸殞越伏深

降誕日進馬及織成紅錦地衣狀

于邵

右臣伏以今月十九日陛下降誕之辰萬國駿奔二儀交



泰玉帛方陳於闕下慶抃實匝於寰中臣謬荷殊恩思登
壽域伏以馬則雄姿未識此句疑誠謝於權奇織成乃異於采箱
宜或存於煥爛懿茲致遠之用宜秉令章之資憑物尊誠
感恩祝聖所獻雖慙於萬國均情實萬於等夷臣不勝懇
悃之極

為京兆李尹降誕日進衣狀

劉禹錫

一 副四事云云

右伏以德水方清真龍下降天長地久
瞻北極而常尊獻壽稱觴配南山之集作永固臣地叨集作宗
屬職忝尹京慶荷之誠倍萬常品前件衣服謹詣銀臺門
奉進輕瀆旒宸伏用兢惕集作惶

降誕日進銀器物及零陵香等狀 令狐楚

右伏以千年元命之符四月正陽之氣出震吉日繼乾良
辰黃河再清冠中古之表德恒星不見掩西方之誕聖前
件器物或堅白無玷或馨香有聞敢同率土之心以續如
天之壽于冒宸宸伏增戰越

降誕日進鞍馬等狀四首

前人

右臣伏以繞樞之電曾委瑞於軒皇照室之光昔呈祥於
漢后伏惟皇帝陛下貴從天下明在日中當四月之正陽
乘千年之聖運人神叶慶朝野同歡臣任重戎旃路遙天
闕懽呼萬歲如聞山嶽之聲傾竭一心庶均葵藿之志前
件馬等誠非珍異頗似柔馴于冒宸宸伏增戰越

二

右伏以月惟首夏氣叶正陽一人慶誕之辰萬國樂康之
日臣某屬連枝葉守在邊陲觀河水之既清知冬松之盛
益一作茂前件馬并鞍轡等安其馴教考以精誠敢緣九族
之恩願續萬年之壽于冒宸宸無任戰越

右臣伏以大電繞樞之辰普天咸慶神光照室之夜匝地同歡臣限守邊陲未朝雲闕尚想河清之色如聞里社之聲前件鞍馬等久似柔馴皆經考教任土作貢慙述職於微臣如日之昇願並明於聖主干冒陳獻伏增戰越

四

右伏以里社既鳴斗樞爰電誕生元聖允叶純陽實萬國同歡之時而千齒兆慶之月臣某限從邊役還奉天慈飲河每挹於清瀾向闕遙瞻於紫氣前件鞍馬等駿非金骨麗乏錦韉慙無照地之光願獻呼嵩一作之壽干冒陳獻伏增戰越

降誕日為揚大夫奏修功德并進馬狀 前人

右臣伏以居至道之尊其唯元命助無疆之祚亦在勝因

四百五十三

又卷六百四十一

三

作

是以千年為慶誕之期百福有莊嚴之義伏惟皇帝陛下以文武道為天人師降生於純陽之月續承于大寶之位効祉而四天奔走流權而萬國謳謌臣某職在監司土無玆異恨無以拜上玄之慶酬厚載之仁敢仗普通轉修經戒仰申誠懇以就有為之功上為聖神庶資無量之壽其馬久令教習頗似柔馴願承內廐之恩以備屬車之駕干冒塵瀆不任戰汗之至

降誕日進器物狀四首

王仲周

右伏以執契牧人運歸聖德天臨日照慶集嘉辰瞻太極之肇分仰濛汜之初浴歡忻感戴踴躍屏營臣限守方隅不獲稱賀上件銀器等隨狀奉進

二

右伏以紫氣充庭黃河變色用符昌運式表誕彌雖聖壽

齊天不假封人之祝而獻芹為禮空馳野老之誠上件銀器綿錦綾綺等謹遣某官隨狀奉進

三

右伏以厥日誕祥惟天降聖歡連率土慶集茲辰前件器物雖竭愚誠欲申上獻顧惟簡薄難備下陳伏以陛下勤恤為心慈儉成德是用恭行聖旨為禮不寶遠物為珎臣限以跼守遐藩不獲申慶天闕竊同織草長傾向日之誠願比封人遠獻如山之壽無任戀慕歡躍之至

四

右伏以四月孟夏千年聖期社鳴表祥河清叶慶臣於是日限守列藩不獲望南山以獻觴聞擊石以率舞屏營戀慕不知所裁上件器物等謹遣某官隨狀奉獻

進農書狀

柳宗元

四百七十

文苑六百四十一

四

農書三卷右伏奉某月日制集作勅宜以二月一日為中和節

所司進農書永以為恒式者臣伏以平秩東作虞書立制倣載南畝周雅垂文此皆奉天時以授人盡地力而豐食自陛下惟新令節益勵農功既立典於可傳每陳書而作則耕鑿之利敷帝力於嘉謨稼穡之艱動天心於眷覽集作鑒勤勞率下超邁古先凡在率土不勝幸甚前件農書謹函封進謹奏

進田弘正碑文狀

元稹

田弘正魏博德政碑文右前件碑文伏蒙御札朱書遣臣撰述恩生望外事出宸衷銘鏤骨肌難酬雨露臣伏以陛下所以令臣與弘正立碑蓋欲遣魏博及鎮州將吏等並知弘正首懷忠義以致功勳臣若苟務文章廣徵經典非惟將吏不會亦恐弘正未詳雖臨四達之衢難掩萬人之

口臣所以効馬遷史體叙事直書約李斯碑文勒銘稱制使弘正見銘而戒逸將吏觀叙而愛忠不隱實功不為溢美文雖朴野事頗彰明伏乞天慈特留宸覽其碑文謹隨狀封進謹具奏聞伏聽勅旨

進幽州紀聖功碑文狀

李德裕

奉宣令臣撰述者伏以北狄強悍勇於四夷前代聖王莫能制伏昨者迴鶻雖乘危蹙勢已內侵豺狼之師尚餘十萬陛下神武雄斷智出無方震天威以霆聲碎獯戎而瓦解武功盛烈高視百王豈比周穆大戎之征荒服不至漢武馬邑之詐羣帥無功將垂耿光宜命鴻筆臣學慚集作荒淺久病衰羸集作紀軒后之功徒知竭思叙唐堯之德終愧難名採其功狀稍似摭實今已撰訖謹連進上輕瀆宸嚴集作不任惶越謹錄奏聞

五月

文苑六百四十一

五

仁

進詩狀

元稹

臣某雜詩十卷右臣面奉聖旨令臣寫錄雜詩進來者伏惟皇帝陛下學深江海文動星辰乙夜觀書秋風賦詠微臣入院之始學士等盛傳陛下親批賀雨一章體備鸞凰思深集作珠玉臣雖不得目覩宸翰臣實竊得心念聖言既仰燭龍之光難逞聚螢之照欲為陳獻益自慚惶況臣九歲學詩少經貧賤十年謫官備極恓惶凡所為文多因感激故自古風詩至古今樂府稍存寄興頗近謳謠雖無作者之風粗中道人之採自律詩一百韻至於兩韻七言或因朋友戲投或因悲歡集作或自遣既無六義皆出一時詞旨繁蕪倍增慚恐今謹隨狀陳進集作無任戰汗屏營之至

進新舊文十卷狀

李德裕

四月二十三日奉宣令臣進來者伏以揚雄云童子雕蟲
篆刻壯夫不為臣往在弱齡即好詞賦情性集作性情所得衰
老不忘屬吏職歲深文業多廢意之所感時乃成章豈謂
擊壤庸音謬入帝堯之聽巴渝末曲猥蒙漢祖之知跼蹐
慙惶神魂飛越謹錄新舊文十卷進上輕瀆宸嚴無任兢惕
代李尚書進畫馬屏風狀
李翱集無

為裴相公進東封圖狀

劉禹錫見集本

集賢殿御書院開元東封圖一函右臣謹按開元十三年

玄宗皇帝以天下太平登封東岳聲明文物振耀古今伏
惟陛下丕承耿光再闡鴻業祖宗盛事紹復有期臣所以
寫成此圖輒敢上獻至於續畫躬自指搗御史氏之文纂
禮容之要山川氣象悉擬真形羽衛威儀咸稽故實所冀
眷情一覽遐想玄蹤臣叨榮過深抱疾已久望陛下告成
之日心必前知嗟老臣將謝之年身恐不見疲羸之際感
激倍深前件圖謹差其官某乙謹詣光順門奉進謹奏

進西北邊圖經狀

元稹

京西京北圖經四卷右臣今月二日進京西京北圖一函

山川險易細大無遺猶慮幅尺高低閱覽有煩於眷鑿屋
壁施設俯仰頗勞於聖躬尋於古今圖籍之中纂撰京西
京北圖經共成四卷所冀衽席之上歌枕而郡邑可觀遊

幸之時倚馬而山川盡在又太和公主下嫁伏恐聖慮念其道遠臣今具錄天德城已北至迴鶻衙帳已來食宿井泉附於圖經之內并別寫一本與圖經序謹同封進其圖四卷隨狀進呈

進憲宗哀冊文狀

令狐楚

右奉勅令臣撰者臣今撰了謹連如後竊以揚先帝無疆之德薦陛下罔極之思宜擇能者永垂不朽聖意以臣備位相府策名文場忘其庸虛賜以撰述頃自哀迷重疊心緒摧落雖磨鉛雕朽已竭其精誠捧日窺天難窮其高遠干冒封進無任悲躍屏營之至

進貞懿皇后哀冊文狀

常衮

右奉進止令臣撰詞訖謹隨狀封進伏以纂述坤儀弘宣聖悼禮有追冊文以叙哀前代已來舊章不易屬詞之重

四百四十一

七

列傳

高選文臣晉之恭后則王彪之頽延年咸製其詞哀華著稱至貞觀中文德皇后遷座特詔虞世南撰述編於文館永播徽音此三臣者皆以鴻藻奮於一時用能紀皇靈之風煥青史之簡臣才學甚淺典策非工承詔兢悚匪遑夙夜伏自循省叨竊至深陛下往命貴妃追封殊號冊謚之令皆臣奉行德範柔明多所遺闕退思鄙薄于今愧赦况又獲承慈旨重紀芳猷雖竭庸虛慙無麗藻屬文明天下多士盈朝顧其式瞻何以昭示冒嚴上獻益用兢惶無任戰懼之至

文苑英華卷第六百四十一

登仕郎胡柯

鄉貢進士彭

叔夏

校正

進貢下

進金花銀櫻桃籠等狀一首

進白蕉狀一首

進娑羅樹枝狀一首

進古銅器狀一首

進金盞并瓊子狀一首

進瓷器狀一首

進馬狀一首

進異馬駒狀一首

進白兔狀二首

進鷹狀三首

進雙雞狀一首

進白雀狀一首

進金花銀櫻桃籠等狀

令狐楚

右伏以首夏清和含桃香熟每聞採擷須有提携以其鮮紅宜此潔白前件銀籠并煎茶具度等羨餘舊物銷鍊新成願承薦寢之羞敢効梯山之獻其通犀瑇瑁上藥等買並依價採皆及時誠非珍奇恐要聚蓄勤拳丹款不敢

不進

進白蕉狀

前人

右伏以半夏欲生正陽初王將勝時熱在新其衣前件白蕉先時織成依價市得光雖讓雪踈不礙風願充當暑之服爰申任土之貢干冒宸聰無任戰汗

進娑羅樹枝狀

張謂

右所管四鎮境天竺山壓枝一作祇園國有拔汗那最為密

近乃一作木有娑羅樹特稱奇絕不庇凡草不棲惡禽聳幹

無慚於松栝一作栝成陰不愧於桃李但以生非得地譽絕

因人榮枯長在於異方委棄不聞於中土陛下高視三代

橫制四夷威信浹於君長仁惠霑於草木前件樹枝臣去

載已進訖臣伏以凡遵播殖貴以滋多今屬陽和之時願

助生成之德近差官於拔汗那計會又採前件樹枝二百

葦並堪進奉如得託根長樂擢頴建章布葉垂柯隣一作連
月中之丹桂連枝接影對天上之白榆於物無遺在人知
感謹差軍將李滔押領赴京

賀衢州進古銅器狀

張九齡

右伏見衢州所進瑞魚銘等神物瓌竒形製純古魚爲龍
象旣章受命之元銘作龜文更表錫年之永河圖舊事無
以加之臣升集作叶贊休明屢承福應恭惟拜慶倍百恒情
伏望宣付史館傳之不朽無任喜躍之至

進貢扶風縣平地穿得金盞二枚并甕子一

枚狀

于公異

右臣得所由狀送前件物至臣所者臣輒令瑩拭非是常
珍宜在昇聞輒敢上獻陰陽造化神妙潜功群生旣偶於
昌期靈貺豈私於聖德伏惟皇帝陛下化通玄默躬贊昇

四九五

文苑六百四十二

二

十一

平神功所以服不庭大孝所以尊清廟故天惟儲慶雲物
表瑞於非煙地不韜珍寶玉騰光於內府陛下方弘至道
爰紀殊祥仰聖德而彌高在天心而難讓至如此寶安敢
無言觀其形製標竒非一時之物精輝旁射逾百鍊之珍
臣輒比擬他金光芒獨映求之故事未或前聞表孝通誠
美已彰於盈缶徵神錄異慶常美於化鈞况其賦質堅剛
銷形盞盞膺大雅獻酬之用告太平歡樂之符時佇休明
潜躍久同於瓦礫道合交泰成器堪佐於罇罍况因封管
而生似表微衷而獲儻從殊貨是更褒揚必取類於金堅
至遂成於家寶期於銘刻傳在子孫長承聖主之恩使効
微臣之節

代人進甕器狀

柳宗元

右件甕器等並藝精埏埴制合規模稟至德

之陶蒸自無苦窳合大和以融結克保堅貞且無瓦釜之鳴是稱土礪之德器慚瑚璉貢異器丹旣尚質而爲先亦當無而有用謹遣某官某乙隨狀奉進謹奏

進馬狀

元稹

同州防禦使供進烏馬一疋八歲堪打毬及獵右臣竊聞

道路相傳車駕欲暫遊幸温湯未知虛實者臣職居守土

侍從無由集作因羨魏闕之埃塵猶隨日御恨新豐之雞犬

亦聽車音目斷魂消形留神往又得進奏官狀知河中華

州京北府並於昭應排比進獻臣當州素乏所出無以粗

展丹誠臣旣別受恩私又不合獨無壤莫伏以前件馬北

方正色東道竒蹤調習多時備諳材力集作色解擊毬者每

嘉其環回斗轉動可集作必愜心善獵射者皆歎其度壘踰

溝走不換足欲隨正至獻賀竊慮群衆混同徘徊顧瞻蓄

銳斯久今者宸遊近甸帝降靈泉施展是時戢藏何益伏

望陛下揚鞭頓轡取驗其馴良結尾絡頭試觀其神彩臣

某深恩未報愚志空存自慚駑鈍之姿莫展驅馳之効捫

心戀主因馬喻身輕冒天威無任戰汗其馬謹隨狀進謹進

進異馬駒狀

令狐楚

右臣得征馬使穆材狀謹具毛色如前者臣伏以行地之

用莫神於馬擅華名者則衆効竒質者甚稀伏惟陛下廣

大際天高明配日殊祥競發休祉荐臻前件馬稟天駟之

精體坤元之德毛拳惟細躡赤而高尾掉肉而蜿螭額帶

星而倜儻臣謹差虞候辛峻專往覆視具如前列峻云雙

瞳有耀四蹄如削宛然天產定是龍媒允協建午之辰光

昭太一之貺臣見今就太原府養飼旬月稍任行步即專

陳獻謹差某官聞奏

為太原李說尚書進白兔狀

前篇作表

前人

貞元十二年

右臣得嵐州刺史趙佺六月二十九日狀稱嵐州合河縣太平鄉大慶村收獲前件白兔差行官李希林送到者臣謹按瑞應圖曰白兔壽千歲滿五百則色白又曰王者恩加耆老則白兔見臣伏以白為正色兔實仁獸來皆有為前篇作應出必以時伏惟陛下聖壽無疆神功不宰是故太陰精魄降以為瑞皓質玉立素毛霜垂清明不讓於殷狼皎潔可齊於周鹿況村為大慶鄉號太平無為而成不索而獲協元符之一氣彰皇德於千齡雖標中瑞之科實應大朝之曲前篇作典臣忝守藩前篇作方鎮觀茲休祥無任抃躍歡慶之至

此篇六百十二卷表門重出前已削去

同前

前人

五十一

文苑六百四十二

四

丁方

右貞元十二年六月嵐州刺史於州界太平鄉獲白兔一臣已并圖進獻死斃一作於中路惜其誕生靈質不達明庭誠意所求禎祥荐至今又得狀宜芳縣孝義鄉百姓王貞收得前件白兔送到者臣謹按瑞應圖云王者仁及鳥獸則白兔見臣伏以兔之為獸麋狡者多獸之有毛羸雜者眾臣觀前件兔皓然養素恬爾守柔處群萃以自殊抱貞明而不汙皎如疊雪燦若凝霜克生孝義之鄉實表中和之化伏惟皇帝陛下恩覃動物澤及毛群方弘三而之仁果應千齡之瑞若非上天慈惠下土清平則安得四年之中再見其地信可以摘皇王之懿德薦臣子之明誠昭彰可徵彤蜺如答臣覩茲潔即宛在封疆踴躍欣懽實倍恒品謹遣某官并圖隨狀奉進

為易定張令公進籠鷹狀

鄭綬

右件鷹鳥去秋來頻令入草一一揀擇皆有所能試其搏擊下韜必中伏以上困五坊固多殊異之選下土一物實表臣子之誠敢望備羽獵於長楊從蒐狩於天仗輕瀆旒宸無任屏營之至

進白鷹狀

張謂

右臣管內大小鷹娑羅山採得前件鷹簡擇並堪進奉特稟異氣挺生殊姿頭圓頂平臆闊脰短丹目時轉志陵雲霄花毛始齊色靜霜雪既拔奇而賞異實超等而殊倫但四鎮川原千里砂磧草木既少禽獸亦稀礪志爪距調其羽翮徒有願於擊搏竟無階於効用今寒風凜冽殺氣嚴凝萬乘時巡六龍冬狩出樊籠之地登校獵之場必能隨人指蹤驅御苑之狐兔順時行令逐禁林之鳥雀物性有適天心所知

四十五

文苑六百四十二

五

丁方

進異鷹狀

令狐楚

右臣所管採捕得前件鷹兩翅齊肩雙翎對懣雖非神俊稍似瑰奇以臣微誠輒敢陳獻風霜之後儻獲得用於三驅鳥雀之中曾冀成名於一擲干冒宸宸無任戰越

同州進雙雞等狀

元稹

同州防禦使供進烏鶻并雙雞共四聯右臣當州元和十五年奉宣令採雙雞五聯各重四斤頻年採取一聯不獲自臣到州詢問採捕人等皆云二十年前採得一聯雙雞爾後更不曾採得昨旬日之內併獲兩聯斤兩輕重稍符詔旨況浚郊初啓既已大翦豺狼鷙鳥負來可以助清臬獍臣所恨身無羽翼不獲陪奉屬車擒狡兔之根源破狐狸集作妖狐之群黨臣其無任忘軀思奮覩物感恩之至謹遣某官某乙隨狀奉進謹進

為政事進白雀狀

蘇頌

右巢於黃門外省過官廳事丹眸瑩徹明若流珠嘉毳鮮
華光如蘊玉臣等謹按瑞應圖白雀主鐵券陰之精也不
來則國無後嗣伏以青宮踐位慶重離於上天黃閣曾巢
屬瑞五於明日固以事優銜錄聲高作頌臣等叨陪近侍
喜萬恒情無任抃躍之至

文苑英華卷第六百四十二

登仕郎胡 柯 鄉貢進士彭 叔夏 校正

雜奏狀

奏度女道士等狀二首

代伊僕射奏請女正度狀一首

奏得嘉禾嘉瓜狀一首

奏行營兵馬狀一首

奏投降迴鶻狀一首

奏黃家賊事宜狀一首

奏太原官吏選數狀一首

奏教習長槍弓弩狀一首

奏排比第二般差撥兵馬狀一首

奏教兵馬狀一首

奏差赴許州兵馬狀一首

奏加嶺南州縣官料錢狀一首

奏桂管常平義倉狀一首 奏令子弟主辦遷奉狀一首

奏孝子劉敦儒狀一首

奏百姓割股狀二首

奏誅逆人等狀一首

奏黃州錄事參軍張紹棄妻狀一首

奏賤妻鉢狀一首

奏度女道士無名尼等狀

王仲周

右伏以理代弘道三教同歸聖誕佳辰萬靈叶慶上件女

道士無名尼或早授畢法 已聞具戒願編僧道之錄永

遂修持之心今因降誕日伏乞賜其正度

奏姚季立妻充女道士狀

前人

右件驍將自貞元 年身亡其妻行服三年情禮畢備去

歲秋首已及祥除素習真經志願入道伏以草野之人能

修相舟之誓義足以勸志不可移今因聖誕之辰願崇景

福請度充女道士法名真玄仍請就潤州道林觀

代伊僕射奏請女正度狀

呂溫

光祿大夫尚書右僕射南兖郡王臣女請度尼某乙

右臣伏以陛下降誕之辰率土蒙幸臣於含氣之內獨受

深恩

集作思獨

思所以稱慶南山獻心北極遂割骨肉之愛

俾歸岑寂之門結幽願於金仙奉勝因於寶壽冒昧上請

精誠匪他陛下以釐革初行渙汗無反憐臣罄至之分事

與恩違念臣愚魯之忠貸於法外特降中使俯加慰諭臣

忝居端右之地首干畫一之科

集作文

誠雖奉上義乖率下

合當嚴譴忽被殊私震驚失圖慙跼罔據荷降鑒之明原

情斯在蒙曲全之澤為感則深輒

集作輕

瀆宸嚴伏增殞越

謹奏

奏汴州封丘縣得嘉禾浚儀得嘉瓜狀

韓愈 集無

右謹按符瑞圖王者德至於地則嘉禾生伏惟皇帝陛下
道合天地恩沾動植邇無不協遠無不賓神人以和風雨
咸若前件嘉禾等或兩根並植一穗連房或延蔓敷榮異
實共蒂既叶和同之慶又標豐稔之祥感自皇恩微莖何

五三六

文苑卷之四十二

二

極於造化親逢嘉瑞小臣喜遇於休明無任

云云

奏差赴唐州行營軍馬狀

崔行先

右伏奉今月日墨詔令選擇馬軍三百騎隨中使赴唐州
臣當時已具聞奏訖臣所管士馬常經校試蓄銳斯久惟
忠益彰常持報國之心盡秉一作盡懷恩之分忽奉詔命頓
生光輝豈意宸私俯察誠願三軍抃舞闔境歡呼並喻以
勲忠形於感激雖慙數寡不愧衆多蔚為天討之師自假
神威之福其器械軍容等並得鮮潔亦稍豐饒以今月十
三日從鳳翔府隨中使進發訖臣職當護塞志切除姦不
獲齒列諸軍身先士卒助銛鋒於破賊逆節斯摧俾寸燭
以燎原焚枯可待臣無任憤悱踴躍之至

奏投降迴鶻大首領大將軍安達干等狀

于邵

右臣得邠州節度使牒上件人等背逆歸順去被懷恩招

來打鳴沙縣便擬將收長安為不奉可汗處分遂却迴邪
寧投降並到使訖謹遣監軍使徐欽令領赴闕庭者迴鶻
遠蕃素効誠節自中原倣擾累建勲庸陛下約為弟兄式
崇惠好我即示以恩信親仁善隣之道彼亦懷於德澤為
不侵叛之臣而逆豎猖狂間行招誘初遭誑惑雖衿甲而
即戎遽感恩私竟去米身而請命可汗既不助逆懷恩當即
成擒殘孽永清指劫非遠

代裴中丞奏邕管黃家賊事宜狀

柳宗元

此狀載宗元集卷華作今孤楚時楚為中書舍人恐非

右今月四日邕管去事官嚴訓過稱押衙譚叔向等與黃家
賊五千餘人謀為劫動雖已誅斬猶未清寧臣當時差本
道同十將試光祿錫雷遶至邕管界首賓州以來刺集作
探事宜兼為聲援昨得雷遶十四日狀并嚴訓狀報同到
其黃家賊並已退散各歸洞穴訖伏以鼠竊狗偷非足為
患陛下威靈遠被神化旁行遂使姦狡集作之謀先期而
自露回邪之黨不戮而盡滅集作伏恐飛章已達吉語未
聞尚軫天心猶煩願筭臣謬居方鎮忝接疆界所得事宜
不敢不奏

五五

文正公集卷之四十三

三

奏太原府資望及官吏選數狀

令狐楚

右臣得司錄參軍李旦等狀稱前件府名三都望同兩府
吏曹近日稍易舊規格限之中增加選數特乞奏聞者謹
檢開元十一年正月二十八日勅置北都府縣資望並準
京兆府河南府中間吏曹暫有降下前使王縉薛兼訓馬
燧李說並有舉奏尋蒙復舊今準三月十五日勅停減諸
州府雙曹司錄判司及甲曹參軍特蒙勅旨京兆河南太
原三府不在減限伏以太原府龍興盛業天啓雄藩有義
旗起建一作建起之堂為仙駕留遊之地官標留守驛署都亭

典章甚明制度咸在數年來吏部選格不同京北河南兩府官資稍下選數則深掾吏諸臣懇有披訴儻伺疑作從權之義恐乖仍舊之規伏乞聖慈特勅吏部準元勅與京北河南一例處分

奏教習長槍及弩狀

前人

右淮泗寇盜猶或未一作未掃除天下人臣皆思奮擊臣伏以射渠魁之目勁弩為先春大憝之心長槍是切比雖兼習多不專精臣今選定前件官健取八月四日於城東起教不敢不奏

奏排比第二般差撥兵馬狀

前人

右臣伏以逆賊兵少誠孤負聖明作為姦亂尚延晷刻之命未即雷霆之誅天下人臣皆同憤激況臣任當旄鉞誓掃煙塵割肌皮以資軍亦無所苦執干戈而衛國唯恐不堪況將士等忠義居心堅剛挺質勇於戰陣樂此征行臣五舟三又卷之百四十三謹差前件兵馬如前其資裝器械一事已上並無所闕續且發日聞奏杖其忠順兵氣自雄諭以功名衆心皆勵矧茲窮寇非足勞師伏望天恩不至憂軫

奏教當道兵馬狀

前人

右臣伏以不教視成爲國之蠹政有備無患前王之格言今吳少誠叛換汝南憑陵淮右雖烏鳶嘯聚見彈已驚而枳棘萌生須鋤其本昨臣所陳章奏願往討平及奉詔書但令排比在軍中之百事誠有舊規以麾下之萬人要知新令謹取今月二十五日於城東準勅教習至二十九日大設後各勒歸本鎮不敢不奏

奏差兵馬赴許州救援并謝宣慰狀

前人

右中使巨希倩至伏奉詔書兼宣恩旨慰問臣今差前件兵馬者臣伏以吳少誠內懷姦詐上負聖明因幸隣喪遂

虧臣節提携逆黨逼孤城凡在忠良不勝憤切況臣謬居方鎮便合討平伏蒙陛下委曲照臨丁寧誨諭感槩而毛髮盡勁憤啓而肺腸皆激諸軍會合計日剪除當道兵馬差定訖已具別狀奏聞

奏加嶺南州縣官課料錢狀

孔幾

右伏以前件州縣或星布海墻或斗一作雲絕荒外首領強黠人戶傷殘撫御緝綏尤藉材幹刺史縣令皆非正員使司相承一例差攝貞廉者懇不願去貪求者苟務徇私臣自到州深知其弊必若責之以理莫若加給料錢今具分析如前並不破上供錢物輒陳管見務在遠圖伏乞天恩允臣所請

奏桂管常平義倉狀

李渤

臣伏詳勅文本救荒歎忽有危切貴及其時當州去京往

五十三

文苑卷之百四十三

五

來萬里奏迴方給豈及飢人臣請所管忽遇災荒量事賑貸訖續分析聞奏庶使遠人速活聖澤遐流臣之所管僻在嶺外迫以山賊人尤難理若令數改必困蝨食常平義倉本救災害向為歎診擢臣處之方鎮臣宜竭力上答皇明伏乞聖恩允臣所奏庶使皇靈遠被擴俗知恩

奏準詔令子弟主辦遷奉事狀

裴次元

臣某言伏以幸遇通年奏請遷奉事伏奉月日手詔令子弟主辦以趁時日者私願上陳天書下降跪承恩一作命榮感失圖臣實不天幼丁家禍荐鍾凶釁方在童蒙逮于成人終鮮兄弟比以時日非便顧室且貧日居月諸未辦歸祔痛心疾首以候吉辰昨日一作陳露下情求替遷奉赴任之日亦具奏聞今奉詔書令子弟主辦雖懇辭上黷而天聽未迴荷朝廷之寄深望阡兆而心殞臣即準詔遣子

某專往揚州舒州主辦便赴上都續具聞奏臣揆以才劣職任非輕不敢重陳再煩睿覽懷罔極之感章奏冀允於深誠捧絲綸之書獎任益彰於聖旨顧違恩重哀荷難任臣不勝荒塞摧迫之至

奏孝子劉敦儒狀

權德輿

元和八年時為東都留守

孝子劉敦儒年四十九

曾祖子玄祖既父決住東都從善坊

右件人名儒史官之家積成教義至性誠孝感動人倫母患風狂心緒乖亂無故榜箠常至僵仆或凍於積雪之下或曝於赫日之中腐爛皴瘃一作裂畧無完體見其楚毒方上集作肯飲食敦儒蘇而復起常懼人知承順恬然不覺疾痛因心之道貫於神明欲蓋彌彰事父方著蒸蒸不匱十有六年貞元二十年集無此字留守韋夏卿具狀奏聞奉其年八月二十九日勅宣付史館旌表門閭臣至洛都具詳

五三七

子敦儒年四十九

六

事實聞諸族類布在風謠今又十年不改其養飢寒所迫衣食闕然晨昏所奉朝不繼夕伏以底祿筮仕資廩多門至行絕人尤可嘉獎伏望天恩特授一解褐京官使分司就養則私計集作計食可給寸祿為榮庶厚時風以弘孝理特乞聖慈允臣所奏集作請謹錄奏聞伏候勅旨

奏百姓王士昊割股狀

令狐楚

右臣得太原府牒前件人為母阿張患瘦病割股奉母其母所疾漸損者臣伏以登于大孝在禮為難忍其甚痛於人不易王士昊長於市井利在錐刀誓以誠明之心療其羸老之疾割肉於股饋羹于堂信可以感通神明風變人俗某猥司廉察獲守方隅以此至性恐湏旌表

奏榆次縣馮秀誠割股奉母狀

前人

右臣得太原府牒前件人為母父患割股奉母所疾漸損

者臣差當縣攝主簿劉戡檢驗得狀具如前申者臣伏以
縱螫及膚口猶難忍援刃次骨心豈易安前件人出於畎
畝之中長在草茅之下天生仁孝日用元和忘甚痛於已
軀期有瘳於親疾人倫共感名教所宗斯實陛下仁奄周
王孝逾虞帝陶蒸動物之性啓迪仁人之心況臣守在方
隅職司廉察據其至行恐合褒稱

奏誅逆人等狀

于邵

右前件官等或久登清貫或厚受國恩天步艱難不隨清
蹕僞庭頽頽忍飲盜泉或脩撰文書或統制兵馬或動衆
以資敵或作奸以蠹人事迹昭彰實不可掩臣等初命禁
錮伏候聖恩輿議囂然皆將傳刃此輩大逆無道覆奏難
容臣叅諸禮法按軍令訖匿瑕含垢誠君父之恩私嫉惡
剛腸亦臣下之職分擅此處置伏增戰越

五十一

文苑卷之四十二

七

奏黃州錄事叅軍張紹棄妻狀

牛僧孺

右臣得張紹妻盧氏狀其張紹寵婢花子每令無禮相陵
臣推問有實者伏以張紹忝跡衣冠幸陶德化不躬二姓
之好敢瀆三綱之經嬖惑女奴蔑侮妻室非特一作徒衣服
飲食貴賤渾同兼亦待遇等威衽席顛倒款招明白愆尤
至多縱稟性庸愚靡及於教義而歷官州縣合聞於憲章
逞其邪心曾不懼法顧茲醜行恐玷大猷臣職在觀風事
先按俗有關政理敢不申聞伏乞明示罪名流竄遠地使
人知家道以誡士林謹具奏聞伏聽勅旨

奏貶晉陽縣主簿姜銖狀

為人作

令狐楚

右臣劉氏堂外生即故硤州刺史伯華嫡孫左補闕某弟
三女是臣士叔庶子絳州刺史勛外孫父身早亡臣妹多
病遺孤寡婦無所依投及臣揔戎來相依止臣見其成長

須有歸從其妻鉢父在太原曾任主簿誠非匹敵誤與婚
姻豈料如獸之心同人之面縱橫兇悖舉止顛狂旬月之
間豪橫備極惡言醜語所不忍聞有忝祖宗難施面目臣
以為夫婦之道無義則離因遣作書遂令告絕矜其愚下
擬許生全而將校等二十三人牆進於庭確論其事具如
前列請以上聞雖忍孤兒可欺其如衆怒難息特希寬謫
以雪冤疑干冒宸扆伏增戰越之至

文苑英華卷第六百四十三

登仕郎胡 柯 鄉貢進士彭 叔夏 校正

陳請

請亡母邑號狀一首

請公除狀三首

論請舜廟狀一首

處州請隨例行香狀一首

請施行六與開元禮狀一首奏新羅請廣利方狀一首

請孫守亮代男行營事狀一首

為南承嗣請從軍狀一首 請行軍司馬及少尹狀一首

奏請不叙錄將士狀一首 奏請東都洒掃狀一首

閑廐使奏判官改名狀一首

請立前節度使李德裕德政碑狀一首

為長安馬明府亡母請邑號狀

宋之問

臣亡母在於屬一作在外戚夙忝末姻不蔭慶雲早先朝露臣髮膚遺體是亡母所生金紫通班乃聖朝所賜臣每服一

四九三

一新

輕妙嘗一甘鮮何曾不遠媿劬勞近慙榮寵又見同列有太君拜邑命婦入朝臣早孤偏不勝感羨母因子貴幸者何多祿不及親臣獨含恨明年某月改葬有期私門大事莫踰於此臣內寡材術謬忝朝恩外無愆尤夙承母訓郡縣之號翻及臣妻哀榮之禮不霑臣母臣生不侍養歿未追榮若懼不敢祈恩偷生以安厚祿儻歸泉壤何對慈顏臣死罪死罪臣準某月日制令加一階伏乞迴臣此階追贈亡母又臣身死之後合有鼓駕出郊在臣何顏存歿叨借亦許臣亡母用臣威儀臣身當以蓬蔭存榮死足所祈越禮罪實干誅伏惟陛下孝理寰瀛仁及草木皇室之戚軒冕盛於前朝太后之親恩澤踰於曩日臣幸遇非常之主敢祈不次之恩伏乞陛下少念葭莩垂哀犬馬回臣休寵以慰營魂則今日以前報恩於亡母自茲已後盡命於

聖朝無任慊懇悲慕之極謹進狀陳請以聞

為政事請公除狀三首

蘇頌

臣等聞喪禮俯就所貴從宜古先哲王莫非孝子則知服紀漸變以至於除既除之後無不從吉祔即吉祭示不可踰頃者正自山陵奉安宗廟終服變禮今則其時執而不行將何用禮伏惟皇帝陛下孝思罔極首冠禮經然以神器至公理循故實今尚未臨正殿猶御慘衣夫以安上理人莫善於禮今若順情廢禮何以正人羣下顯然不知所措臣等謬陪樞密輒敢陳祈伏乞以禮制情式遵常典無任悚迫之至

二

臣等伏奉墨制固違羣情請一作未許公除臣等茫然罔知

收措臣聞孝者貴合道禮者貴從宜合道始可行孝從宜

四七九

文苑六百四十四

二

始可達禮況先皇遺旨行孝者共遵國朝舊章達禮者同守非宜將焉用禮違命豈得稱孝伏以至尊之制與凡庶不同故易月便除以時漸降山陵既畢謂之反虞宗廟當祔無不從吉今若除不易月降不以時豈得虞而不祔尚居喪服所以先儒執禮適變而除王者從權將除必降伏惟聖懷永慕雖增罔極故事不遠孰可虧違臣等至愚期於死請

三

臣等愚昧頗觀禮典數百年來漢晉間事主天地者不以私廢公行喪紀者故以日易月貞觀之後三宗遺訓著在實錄垂之不朽匪臣等敢率下情屢希上達伏以聖懷罔極孝思永慕失人祗之大願持曾閔之小節使祖宗之禮家國成規陛下因而違之臣等固知其不可皇極神器天下

至公曠時不親衆務皆闕阻羣情非順也顛顛億庶仰望
天光徂夏及秋旬有四日陛下何以承顧託何以撫黎元
臣等惶然不知忌諱敢昧死陳請冀垂昭納明日望於別
次視事以寧臣子荒迫之心

論請舜廟狀

元結 永泰二年

右臣謹按地圖舜陵在九疑之山舜廟在太陽之溪舜陵
古老已失太陽溪今不知處秦漢已來置廟山下年代寔
遠祠宇不存每有詔書令州縣致祭奠酌荒野恭命而已
豈有盛德大業百王師表沒投集作於荒裔陵廟皆無臣謹
遵舊制於州西山上已立廟訖特望集作乞天恩許蠲免近
廟三五集作一兩家令歲時掃拂集作灑以集作示為恒式豈獨表
聖人至德及於萬代實欲彰陛下立澤被於無窮謹錄
奏聞勅依

五十一

文六百四十四

三

一新

處州請隨例行香狀

齊映

右準式文臣當州不在行香之數伏以聖朝弘孝御下崇
福追先憑法力於傳香表永懷於率土下垂甲令旁感物
情臣州稍以遐遠比於列郡遂漏恩私俱承亭育之中獨
隔情禮之外況語桂廣則道理猶近並接衢婺則州望悉
同推於等夷倍切誠懇又垂白之老一命之士或生於開
元天寶或逮事肅宗代宗從頂至足生成是賴五月六月
思慕彌深方當感切之辰難抑衆庶之意臣又以國家榮
建寺觀繼度緇黃所種田疇已為優厚食時受供皆荷殊
恩忌辰修齋當茲別給如蒙聖澤許同隣州應緣香燈所
需皆率官吏取足於刺史以至末班輕減俸錢敬修法事
庶使山越遺老咸覩漢儀海郡具僚率由唐典無任至誠
至懇之至

代鄭相公請刪定施行六典開元禮狀

呂溫

右臣聞化人成俗莫大於禮樂垂統建中必資於制度然
 而忠敬有弊質文異數羣儒之得失鋒起歷代之沿革絲
 棼或榮古而陋今名實交喪或違經而便事本末相忘或
 煩雜集作以為詳或闊略而集作為要未聞折衷以叶通
 方國家與天惟新改物視聽太宗拯焚溺之餘粗立統紀
 玄宗承富庶之後方暇論思爰勅宰臣將明睿旨集儒賢
 於別殿考古訓於祕文以論材審官之法作大唐六典三
 十卷以導集作德齊禮之力作開元新禮一百五十卷網
 羅遺逸芟翦奇邪亘百代以旁通立一王之定制草奏三
 復祇令宣示中外星周六紀未有明詔施行遂使喪祭冠
 婚家猶異禮等威名分官靡成規不時裁正貽弊方遠伏惟
 睿聖文武皇帝陛下恢纂鴻業升于大猷雷霆奮有截之

五十八

文苑六百四十四

四

克

威日月廓無私之照三叛就戮四夷來賓馬牛放集作於
 農郊兵革藏於武庫嚴禋上帝祇受鴻名惟懷永圖不自
 蒲假昧爽聽政子夜觀書處成功而勿休率集作至理若
 不及每懷經始則知貞觀之艱言念持盈思復開元之盛
 臣謬忝密集作樞集作務兼掌圖籍無能輔弼集作已負於恩私
 有所建集作明豈先於典禮伏見前件開元禮六典等聖
 先集作朝所制鬱而未用奉揚遺美允屬欽明然或損益之
 間討論未盡或弛張之際宜稱不同將貽永代之規必俟
 候集作不刊之妙臣請於常參官內選學藝優深理識通遠
 敏集作者三五人就集賢院各盡異同量加刪定然後敢塵
 冀集作紆睿覽特降德音明下有司著為恒式使公私共守貴
 賤遵行苟有僣違必正刑憲如此則職官有制將興濟濟
 之詩風俗大同坐致熙熙之詠見可而獻知無不為輒瀆

宸嚴伏增殞越謹狀

代淮南杜司徒奏集作論新羅請廣利方狀 劉禹錫

淮南節度觀察處置等使勅賜貞元廣利方五卷右臣得新羅賀正使集作朴如言狀稱請前件方狀一部將歸

本國者伏以纂集神効出自聖衷藥必易求疾無隱狀搜

方伎之祕要拯生靈之夭瘥坐比華胥咸躋仁壽遂令絕

域逖聽風聲美茲豐功爰有誠請以其久稱藩附素混車

書航海獻琛既已通於華禮釋痾蠲疾集作癘豈獨隔於內

集作外區正當四海為家冀覩十全之効臣即欲寫付未敢

自專謹錄奏聞

請孫守亮代男行營事狀代郭子儀于邵

右臣前日面奉進旨前件男領兵馬赴靈州伏以朔方軍

幕宿將頗多任以兵權合先勲舊非獨藉其時望亦以厭

伏衆心男晞年纔成立素不更事雖薄閑騎射而未有智

謀軍政弛張或非詳練昨緣逆徒在近畿甸多虞令統先

軍以當大敵蒼黃之際不可固避畢力捐軀幸摧堅陣此

天威所及非童子有成集作欲速赴邊陲實恐未堪專任右

廂兵馬使開府孫守亮出身入仕皆在軍行將校畏威士

卒懷惠智能料敵勇可摧兇使與渾日進同行必冀免貽

聖慮又男晞自幼及長首末隨臣常在私庭未曾遠出深

願容其澣濯許以旬月休閑他日更有任使敢不奔波道

路臣位崇寄重効淺恩深常恐委任失人以速官謗知子

者父敢不上陳伏乞天慈俯哀誠請

為南承嗣請從軍狀 柳宗元

故某官贈某官某乙男某官某乙右臣亡父至德之歲死

節睢陽陛下每降鴻恩必加褒寵臣自七歲即忝班榮垂

五十年常居祿秩再守遐郡績用無成終貽官謗甘就嚴
譴無以負荷先志報効殊私以慚以懼殞越無地伏見某
月日勅以王承宗負恩干紀命將徂征雷霆所加殘集作
滅在近臣竊不自揆思竭忠誠願以集作一卒之任以答
百生之幸庶得摧集作鋒觸刃摩壘塞旗冀獲盡於微誠
儻不墜於遺烈踴躍之至夙夜靡集作寧敢希皇明俯鑒
丹懇臣聞周官考藝國子置車甲之司漢道推恩孤兒備
羽林之用千秋思奮於事越仲孺期死於奔吳義激君親
名高竹帛臣雖無似有慕昔人雖身塗草野死而不朽披
肝瀝血昧死上陳無任懇迫憤激集作忠憤之至謹錄奏聞伏
候勅旨

請行軍司馬及少尹狀為人

令狐楚

右臣適蒙恩獎獲守方隅力小任大常憂敗累伏以行軍

五十五

文苑六百四十四

六

司馬相副之職知府少尹共理之官未得其人久空此位
每平均征賦繕理邊陲實藉通才以分重寄伏惟陛下察
臣心之懇款知軍務之殷繁選於中外為此別貳陛下所
用即臣所知苟獲同心庶無闕事謹遣某官奉狀奏請

為滎陽公奏請不叙錄將士狀 李商隱

使當道將士及管內昭賀等州軍事將士共二千一百二
十六人準去年五月五日制叙勲階使司去今年四月二
十五日具將士姓名及甲授年月日申省訖右臣當道將
士等遠當戎寄式控遐陬乘解愠之和寧親矢石望拱辰
之列實隔煙波近者朝廷奄靖北方惟荒東道當陰山之
哭虜靡効纖埃及天井之摧凶不橫寸草徒以皇帝陛下
非煙結彩集作灑露流光向明纒及於鳳樓布澤遠霑於
蠻徼固合同承國慶共稟朝榮伏以當管近無蠻豎年亦經

小水海上有分屯之卒邕南有未返之師慊冗食於居人
困裹糧於戎士臣初叨廉問方切拊循雖拾級升階各思
受寵而濡毫執簡無以為資仰慮後期敢忘積懼伏見比
者諸道有物力未足者聖恩弘貸許且權未叙錄竊緣往
例冒此上陳伏冀天慈曲垂矜許臣與將士等無任感激
冒昧戰越之至

為楊贊善奏請東都洒掃狀

前人

右臣先臣贈太保其塋在河南縣界臣自終喪紀便忝朝
倫三年贊道於宮庭千里違離於墳墓竊惟令式合許芟
除追遠興情敢希榮於陸曄報恩未死寧自誓於義之伏
乞聖慈特從一作鑿丹懇集作允

為閑廐使奏判官韓勵改名狀 前人

右前件官名與再從叔故媯州叅軍自勵向下一字同伏

五十九

文六百四十四

七

以韓自勵頃因官遊歿於幽朔羈孤未返親黨莫知近始
言歸因之合族雖為子之道則慎更名於已孤而諸父之

集作

來固難舉諱於其側伏請改名融謹錄奏聞伏聽勅旨

請立前節度使李德裕德政碑狀 張次宗

右伏以勲著王室者則銘於景鍾功及生人者則刊於樂
石故扶風存必拜之地岷山有墮一作墜淚之思固有舊章

蓋無虛美竊以李某纘慶相門伏膺儒業得郤穀詩書之

學兼祭遵儒雅之風自授任坤方鎮安全蜀亭戍多警言災

旱相仍外有定戎一作鎮定之功則城柵相望內有繕宇之備

則器甲惟新強寇將罷其東漁隣敵自止其南牧況今令

一作政行屬郡威肅連營來暮之謠已彰於昔歲去思之美

無謝於古人今合境同詞諸郡獻狀雖黃霸入用寵方盛
於登賢而鄧侯不留情猶深於愛樹臣謬當交代備聞政

能願嗟卧轍之情特允紀功之請無任 去古

文苑英華卷第六百四十四

登仕郎胡 柯鄉貢進士彭 叔夏 校正

為馬明府母請邑號狀

若懼此下集有罪字

制令集作制合

遽除

此下集有累葬二字

檄一

為彭城王檄征鎮文

為太祖檄齊神武高歡文

為東魏檄梁文

為行軍元帥鄖國公檄陳文

為北齊檄陳文

為侯莫陳悅檄陳蕭摩訶文

隋檄陳尚書江惣文

為彭城王檄征鎮文

孔熙先今弟休先作

揚州刺史徐湛之告四方王公守宰夫休否相乘天道無

常一作道無恒泰狂狡肆逆明哲是殛故小白有一匡之勲重耳

有翼戴之德自景平肇始皇室多故大行皇帝天誕英聰

聖明睿武一作哲拔自藩國嗣位統天憂勞萬機秉一作垂

庶務是以邦內安逸英華作邦家四海同風而頃一作年

已來姦豎亂政刑法違秉一作刑陰陽潛違一作舛致使豐

起蕭墻飛禍卒集禍萃集危賊臣趙伯符積怨含毒遂縱兇

醜一作姦凶肆兵犯蹕禍流儲貳一作宰崇樹非所一作類傾墜皇

基罪百浞豷過千玄莽開闢以來未聞斯比率土叩心華

夷泣血咸懷亡身之誠同思糜軀之報湛之畢與行中領

軍蕭思話行護軍將軍臧質行左衛將軍孔熙先建威將

軍孔休先忠貫白日誠期一作著幽顯義痛其心事傷其目

投命奮戈萬殞莫顧即日斬伯符首及其黨與雖豺狼即

戮惟新告始一作道惟新而普天無統一作主群萌靡係一作莫繼彭

城王體自高祖明明一作聖明在躬德格天地勲溢區宇世路

威夷勿用南服龍潛鳳棲于茲六稔蒼生飢德億兆渴化

豈惟東征有鴟鴞之歌陝西有勿翦之歎一作思而已哉靈

祇告徵祥之應識記表帝王一作者之符上愜一作答天心下

合人望一作愜民望正位辰極非王而誰今遣行護軍將軍臧

五百六十

景年

質等齎皇帝璽綬星馳奉迎百官備禮駱驛繼進並命羣
帥鎮戍常若干橈義徒有犯無貸昔年使反湛之奉賜
手勅逆誠禍亂預覩斯萌今宣示朝賢共拯危溺無斷謀
事失於後機遂使聖躬濫酷大變奄集哀恨崩裂撫心摧
梗不知何地可以厝身輒督厲廷頓死而後已一作皆宋書范曄傳

英華錄謀逆之檄未詳

為周太祖檄齊神武高歡文 西魏永熙三年

蓋聞陰陽遞用盛衰相襲苟當百六無聞周書作三五皇
家創歷陶鑄蒼生保安四海仁育萬物運距孝昌屯沴屢
起隴冀搔北史作騷動燕河狼顧雖靈命重啓蕩定有期而乘
豐之徒因生羽翼賊臣高歡器識庸庸下出自輿阜罕聞禮
義直以一介鷹犬効力戎行覲冒恩私遂竊北史作階榮寵不
能竭誠盡節專挾姦回乃勸爾朱榮行茲篡逆及榮以專

政伏誅世隆以凶黨外叛英華作世濟兇黨歡苦相勸勉令取京

師又勸吐萬兒復為弑虐英華作傷殺暴虐暫立建明以令天下

假推普泰欲竊威權並歸廢斥俱見酷害於是稱兵河北

假討爾朱亟通表奏去取讒賊周書作敗既行廢黜遂將篡弑

以人望未改恐鼎鑊交及乃求宗室權允人心天方與魏

必將有主翊戴聖明誠非歡力而歡阻兵安忍自以為功廣

布腹心跨州連郡端揆禁闈莫非親黨皆行貪虐寔竊生

靈而舊將名臣正人直士橫生瘡痍動挂網羅故武衛將

軍伊琳清貞剛毅北史作清毅禁旅攸屬直閤將軍鮮于康

仁忠亮驍傑爪牙斯在歡收而戮之曾無聞奏司空高乾

是其黨與每相影響謀危社稷但以姦志未從恐先泄漏

乃密白朝廷使殺高乾方哭對其弟稱天子橫戮孫騰任

祥歡之心脅並使入居樞近伺國間隙知歡逆謀將發相

繼歸逃歡益加撫待亦無陳白然歡入洛之始本有姦謀
今親人蔡雋作牧河濟厚相恩贍為東道主人故關西大
都督清水公賀拔岳勲德隆重興亡攸寄歡好亂樂禍深
相忌毒乃與侯莫陳悅陰圖陷害幕府以受律專征便即
討戮歡知逆狀已露稍懷旅拒遂遣蔡雋拒代令竇泰佐
之又遣侯景等去向白馬輔世珍等徑趣石濟高隆之及
婁昭等屯據壺關韓軌之徒擁眾蒲坂於是上書天子數
論得失訾毀乘輿威武疑作朝庭藉此微庸冀茲大寶溪
壑可盈禍心不測或言徑赴荆楚開疆於外或言分詣伊
洛取彼讒人或言欲來入關與幕府決戰今聖明御運天
下清爽百寮師師四隩來暨人盡忠良誰為君側而歡威
福自己生是亂階緝構南箕指鹿為馬苞藏兇逆伺我神
器是而可忍孰不可容幕府折衝宇宙親當受服銳師百

五十八

多至六百四十五

三

景年

萬勢騎千群累糧坐甲唯敵是俟義之所在糜軀匪愆頻
有詔書頒告天下稱歡逆亂徵兵致伐今便分命將帥應
機進討或趣其要害或襲其窟穴周書電繞虵擊霧合星
羅而歡違負天地毒被人鬼乘此掃蕩易同俯拾歡若渡
河稍逼宗北史廟則分命諸將直取并州幕府躬自東轅
電赴伊洛若固其巢穴未敢發動亦命羣帥百道俱前輟
裂賊臣以謝天下其州鎮郡縣率土人黎或州鄉冠冕或
功勲北史世濟並宜捨逆歸順立効軍門封賞之科已別
有格凡百君子可不勉旃周書

時齊神武稍逼京師魏帝遂入關周太祖乃奉魏帝
都長安披草萊立朝廷軍國之政咸取決於太祖

此篇英華所載甚略今以周書增入

為東魏檄梁文

杜弼藝文類聚

觀夫辰象麗天山岳鎮地方以類聚物以羣分建之以邦

國樹之以君長日月於是莫二一作貳宇宙一作帝王所以物一雖

五運相推百王革命此道之所一作行孰之能改一作能易而

皇家承統光配彼天義洽幽明化周動植崇文德以來遠

修禮讓以止訟舞干戚於兩階執玉帛於萬國立功潛運

至德旁通百姓日用而不知兆民受賜而無迹唯彼吳越

獨阻聲教匪民之咎責有由焉而元首懷止戈之心上宰

薄兵車之會遂解紮南冠喻以好睦舟車遵汧川陸同光亭

徽息奔走之勞屯戍無迫卒之變雖嘉謨長筭爰自我始

而罷兵息民彼獲其利侯景豎子本無事一作業乃枉道

於人間遂乾沒於世上鳴伏於爾朱之門鎮守於普泰之

日曾無爲主之識詐有挈瓶之智既而投命義旗歸身幕

府殊異雍齒有類丁公時逢寬政得免大戮棄其瑕滓收

其力用預在行伍叅跡驅馳及秦隴逋誅每事經略以河

文苑六卷四十五

四

景年

南是空虛之地漢陽非兵戰之衝薄存掎角聊示旗鼓豈

資實効寄以遊聲軍機催勒蓋維景任惣兵統旅則有司存

而愚徧有積驕憤遂甚屢犯軍紀自生疑貳禍心潛構翻

成亂階負恩棄德罔恤天討不義不昵厚而必顛委慈母

似脫屣棄寵弟如遺芥龍鐘稚子痛苦成行孌彼諸姬破

亡爲伍滅伯春之婉轉慕姜兒之爽言不與狼虎同仁而共

豺狸等惡及遠託關隴依憑姦異逆主定君臣之分賊臣

結兄弟之親解其倒懸仰人臯息一日無恩終成難養俄

而易慮躬擐干戈釁暴惡盈側首無託以金陵逋逃之藪

江南統御一作流離之地甘辭卑體進熟圖身讒言浮說抑可

知矣叛豎投命豈將擇音而僞朝大小幸災忘義主荒於

上臣蔽於下逐雀去草曾不是圖竊寶叛邑椒蘭比好人

而無禮其能國乎亦既失信不亡何待今帝道休明皇猷

而無禮其能國乎亦既失信不亡何待今帝道休明皇猷

允塞四民樂業百靈効祉故丞相材標國貞道潤時雨義
冠伊霍勳蓋相文大君立德世功世祿作民舟楫爲國棟
梁內外齊心上下同德虵騰虎嘯風生雲起摩日則車懸
轉舍排山則龍門洞開吞雲夢於肯中運天下於掌內雖
有賊臣去國亡卒出境何異一毛之落牛體雙鳧之飛海
曲濱一作彼旣連結姦惡斷絕隣好追兵保境縱盜侵國蓋
物無定方事無常勢或乘利而受害或因得而更失是以
吳侵齊境遂致勾踐之師趙納韓地終有長平之役矧乃
鞭撻疲民侵軼徐部築壘擁川捨信邀利此而可忍孰不
可懷是以援乘麾殞之將投石拔距之士深銜僞主信納
亡叛含怒作色如赴私讎意存涉血義不旋踵攻戰之利
實若有神徭兵聚衆依山傍水舉螳螂之斧被蝥蟻之甲
當窮轍以待輪坐積薪而候燎及其鋒刃斲援埃塵且接

便已亡戟棄戈土崩瓦解貞陽以從一作猶一作子之親爲戎首

之任非獨一作但一作力屈道窮亦將無路還蜀兼亦一作復一作挾子

垂翅俱在籠樊將士以昧禍之心爲助亂之事皆掬指舟

中被甲鼓下同宗異姓纍纍相望曲直旣殊強弱不等父

出子孤自取其敗違卜復諫何以辭責雖復貪利苟得背

同即異獲一人而失一國見黃雀而忘深井食鈎吻以療

飢飲鳩毒以救渴智者所不爲仁者所不向誠旣往之難

迹猶將來之可追景以鄙俚之夫遭風雲之會位登三事

邑啓萬家揣身量分久當止足而周章向背離披不已夫

豈徒然意亦可見彼乃示之以利器誨之以慢藏使其勢

得容姦令其時堪乘便旣南風不競天亡老賊姦謀將復

作矣然則摧堅強者難爲功拉枯朽者易爲力計其雖非

孫吳猛將燕趙精兵猶是久涉行陣曾習軍旅豈同輕剽

之師不比扼腕之衆距一作此則作氣不足攻彼則為勢

有餘恐尾大於身踵屨於股倔強不掉狼戾難馴呼之則

反速而豐小不徵一作懲則叛遲而禍大會應遙望廷尉不

肯為臣自據淮南亦欲稱帝但恐楚國亡援禍延林木城

門失火殃及池魚橫使漢江一作黃士子荆揚人物死亡矢

石之下支一作天折露霧之中彼梁王操行無聞輕險有素

工用其短以少為多反覆山淵顛倒冠履射爵論功盪舟

稱力年既老矣耄又及之政荒民流禮崩樂壞改換朝章變

易官品雖世異漢朝而事同新室加以用捨乖方立廢失

所矯情動衆飾智驚愚毒蟲滿懷安敢試業躁競盈貫茸

謬治情內恣鴟靡外逞殘賊人人厭苦家家思亂災異降

於上怨讟興於下履霜有漸堅冰且至恃浮一作將躁之風

俗任輕薄之子孫朋黨路開兵權在外必將禍生骨肉難

起腹心強弩衝城長戟指闕徒探雀鷲無救府藏之虛空

伺請一作能能藩詎延晷刻之命外崩中潰今實其時鷓蚌相

危一作扼我乘其弊方使高旗舒旆長轂啓行迅騎追風精

甲耀日四七並列百萬為群風飄雲動星羅海運以此赴

敵何敵不摧以此攻城何城不陷猶為岸上之虎當作水

中之龍以轉石之形為破竹之勢將使鍾山渡江青蓋入

洛荆棘生建業之宮麋鹿遊姑蘇之館但恐兵革一作車之

所輻輳劔騎之所蹈踐杞一作榑梓於焉傾折竹箭以此摧

殘若吳之王孫蜀之公子順時以動見機而作面縛銜璧

肉袒牽羊歸款軍門委命下吏當使焚櫬而出拂席相待

必以楚材終為晉用固乃喜得異度實自利獲士衡士龍即援

客卿之族將加驃騎之號斯蓋壯士封侯之日丈夫立節之秋

冬冰可折時不再來先事喻懷有如皎日王侯無種工拙

在人凡百君子勉求多福若不改迷坐待淪沒一旦暴骨草莽流血成川猶且不悟噬臍何及故宣往意馳此簡書檄之到彼咸共申省

一作皆藝文類聚

此檄與藝文類聚資治通鑑所載並同惟魏書島夷蕭衍傳文既詳復先後亦異今併錄之其僅同者白字是也

夫乾坤交泰明聖興作有冥運行之力俱盡變化之途抱識含靈融然並至呈形賦命混而同往所以玄功潛運至德旁通百姓日用而不知萬國受賜而無迹豈徒鑿其耳目易其心慮悟以風雲一其文軌使夫日月之照不私雨露之施均洽運諸仁壽之域納於福祿之林自晉政多僻金行淪蕩中原作戰鬪之場生民爲鳥獸之餌則我皇魏握玄帝之圖納水靈之祉駕雲車而自北策龍御以圖南致符上帝援溺下土恠物殛死滛水不

作運神器於顧眄定寶命於踟躕恢之以武功振之以文德宇內反可封之俗圓首識堯舜之心沙海荒忽之外瀚漠羈縻之表方志所不傳荒經所不綴莫不繩谷鈞山依風託水共仰中國之聖同欣大道之行唯夫三吳

百越獨阻聲教匪民之咎責有由焉自僞晉之後劉蕭

作慝僭擅一隅號令自已惟我祖宗馭宇愛民重戰未極謀臣之畫不窮節將之兵聊遣行人降以尺一圓臺已築黃屋輒去賜其几杖置之度外蕭衍輕險有素士操茂聞睥睨君親自少而長好亂樂禍惡直醜正巧用其短以少爲多該惑愚淺大言以驚俗驅扇邪僻口兵以作威曲體脅肩搖脣鼓舌候當朝之顧指邀在位之餘論遂汗辱冠帶偷竊藩維及寶卷昏狂下不堪命曾無北面有犯之節遽滅人倫在三之禮憑妖假恠鬼語神

言稱兵指闕傾朝鳩主陵虐孤寡聾愚士民天不悔禍
姦醜得志內恣雕靡外逞殘賊驅羸國之兵迫糊口之
衆南出五嶺北防九江屯戍不解役無寧歲死亡矢刃
之下夭折霧露之中哭泣者無已傷痍者不絕託身人
上忽下如草遂使頑嚚子弟肆行媮虐狡猾羣小縱極
貪恡剝割蒼生肌肉略盡剗剔黔首骨髓俱罄猛虎未
方其害餓狼詎侔其禍慄慄周餘救死無地至於矯情
飾詐事非一緒毒螫滿懷妄欺戒業躁競盈曾謬治清
靜至乃大興寺塔廣繕臺堂昭陽倒景垂珠銜壁崢嶸
刻削千門萬戶鞭撻疲民盡其筋骨延壤運石悲歌掩
途死而可祈甘同仙化智淺謀疎曾不自揆遏桐栢之
流翻爲已害子亡齊之胤忽爲戎首書契迄茲罕聞其
事至於廢捐冢嫡崇樹愚子朋黨路開彼我側目疾視

扼腕十室而九翹足有待良亦多人二紀於茲王家多
故始則車馳之警終有驚墜之哀神祇痛憤寓縣崩震
於是故相國齊獻武高王感天壤之慘贖激雲雷以慨
然仗高義而率民奮大節以成務爰有匡國定霸之圖
非直討賊雪耻之舉於是勦略紛紜靈武冠世盪滌逋
孽尊主康邦皇上秉歷受圖天臨日鏡道隨玄運德與
神行旣而元首懷舞戚之風上宰薄兵車之會遂解紮
南冠喻以好睦舟車導溯川陸光華亭微相望欣然自
泰反肉還童不待羊陸雖嘉謀長筭爰自我始罷戰息
民兩獲其泰王者之信明如四時豈或爲人君父二三
其德書而不法可不惜哉侯景一介役夫出自凡賤身
名淪蔽無或可紀直以趨馳便習見愛爾朱小人叨竊
遂忝名位及中興之際義旗四指元惡不赦實在群胡

景荷人成拔藉其股肱主人有丹頸之期所天蹈族滅
之釁雖不能蔽捍左右以命酬恩猶當慘顏後至義形
於色而趣利改圖速如覆手投身麾下甘為僕隸獻武
王棄其瑕穢錄其小誠得廁五命之末預在一隊之後
參跡驅馳度其來効長鞭利鍛術以制之既關隴通誅
每事經略以河南空虛之地非兵戰之衝薄存犄角聊
示旗鼓豈負實効寄以遊聲軍機催勒蓋為景任惣兵統
旅別有司存而愚徧有積橋復遂甚犯違軍紀仍自猜
貳禍之瘡構翻為亂階有恩棄德罔恤天討不義不昵
厚而必顛委慈母如脫屣弃少弟如遺土羣子陸陸妻
姪成行慕姜兒之爽言蔑伯春之宛轉跳梁猖蹶夫欲
誰欺比之梟獍異類同醜欲擬虵鼠顧匪其倫及遠託
關右委命寇逆實炬定君臣之分黑獺結兄弟之親授

五十四

文苑六卷四十五

六

以名器之尊救其重圍之死憑人繫援假人臯息俄而
忘恩背惠親尋干戈釁暴惡盈側首無託以金陵遁逃
之數江南流禦之地甘辭卑體進欺圖身詭言浮說抑
可知矣叛整救命豈將擇音偽朝大夫幸災忘義主老
於上之臣蔽於下遂崔去草曾不是圖竊寶叛邑椒蘭比
好人而無禮其能國乎夫安危有大勢成敗有恒兆不
假離朱之目不藉子野之聽聊陳刺心之說且吐伐謀
之言人帝道休明皇猷允塞四民樂業百靈効祉雖上
相去亡而伊陟繼事秉文經武虎視龍驤驅日下之俊
雄收一世之英銳擊刺猶雷電合戰如風雨控弦躍馬
固敵是求蠕蠕昔遭離亂輻分瓦裂匹馬孤征告困於
我國家深躬隣附愍其入懷盡憂人之禮極繼絕之義
保衛出於故地資給唯其多少存其已亡之業成其莫

大之基深仁厚德鏤其骨髓引領思報義如手足吐谷
渾深執忠孝膠漆不渝萬里仰德秦款屬路並申以婚
好行李如歸蠕蠕境斜界黃河望通幽夏飛雪千里曾
冰洞積北風轉勁實筋角之時沍寒方猛正羶裘之利
吐谷渾疾彼凶逆疆兵歲舉傾河及鄯塵通隴峽驅龍
池之種藉常勝之氣二方候隙企其移踵加以獨孤如
願擁衆秦中治兵劫憚黑獺北備西擬內營腹心救首
救尾疲於奔命豈暇稱兵東指出師函谷且秋風揚塵
國有恒防關河形勝之際山川襟帶之所猛將精兵基
跼岳立又寶炬河陰之北黑獺北史作芒魏書作士山之走衆無一
旅僅以身歸就其不顧根本輕懷進趣斯則一勞永逸天贊
我也言之旦旦日月經天舉世所知義非徒語持此量
之理有可見則侯景遊辭莫非虛誕夫景繩樞席牖之

子阡陌鄙俚之夫遭風塵之會逢馳騫之日遂位在三
吏邑啓千社揣身量分父當止足而乃周章去就離跂
不已夫豈徒爾事可摧揚度其衆叛親離守死不暇乃
聞將棄懸瓠遠赴彭城老賊姦謀復將作矣固揚聲赴
助計在圖襲吞淵明之衆招厭虐之民舉長淮以爲斷
仍鴟張歲月南面假名死而有已此蓋蜂鷁之禍我承
其弊且僞主昏悖不惟善隣賊忍之心老而彌篤納逋
叛之詭譎茂信義以猖狂天喪其神人重其怨將踐瓜
圃之蹤且追兒侯之轍今猗發犬羊**侵軼**徐部築壘擁
川覬覦小利**此而可忍孰不可懷**兵凶戰危出不得已
謬奉朝規肅茲九伐扛鼎拔樹之衆**超乘**投石之旅練
甲爭途波聚霧合虎班龍文之逸蘭池蒲梢之駟噓天
陸野躡影追風振旅南轅長驅討賊非直三吳鼠面一

麾魚駭乘此而往青蓋將歸且行虓網蚩兵權在外持
險躁之風俗兼輕薄之子孫蕭綸兇狡之魁豈無商臣
之佞蕭譽失志之憤當召專諸之客外崩中潰今也其
時幕府師行以禮兵動以義平民伐罪理有存焉其有
知機審變翻然鵠起立功立事去危就安賞典未忘事
必加等若軍威所至敢有拒違尺兒已上咸從梟戮今
三禮四義之將豹虎熊羆之士深銜通僞信納叛亡違卜
復諫實興伐役莫不含怒作色如赴私讎茹肝涉血義
不旋踵攻戰之日事若有神莽積麻亂匪旦伊夕以彼
曲師危卒望我軍鋒何異蝘蝓被甲螭蛆舉尾正恐旗
鼓一接芝萑俱摧先事喻懷備知翰墨王侯無種禍福
由人斯蓋丈夫肉食之秋壯士封侯之會冬冰可折時
不再來凡百君子勉求多福檄之所到咸共申省知我

五四十九

文苑六方四十五

十一

國行師之意

為行軍元帥鄭國公韋孝寬檄陳文

周宣帝
大象元年

偽陳私署公卿將校州鎮郡縣村屯邑落蓋聞五精上列
耀魄惣其威靈萬國下分皇王攝其區域至其創業垂統
革命受終奄有神州光宅函夏莫不重極襲聖積德累仁
播厚利於人民建大功於天地然後幽明贊叶北度歸往
瑞之以龍圖鳳紀崇之以玉璽黃屋故能照臨九縣對越
兩儀永保鴻名長為稱首未有蠻陬夷落裔土荒隅崛起
阡陌之中妄竊帝王之號斯則僭越之首縣一作懸於漢闕
亡吳之主會於晉臣布在方冊可以龜鏡者也我太祖文
武皇帝自天攸縱膺運挺生屈道藩條或躍伊始屬玄運
將改祿去王室三川已震九鼎將飛事切在泥祿疑作深流曷
乃推誠仗義援手濡足迎衛乘輿崇建旒社舉天維於將

墜振

一作正

地軸於已傾血氣食毛咸受其賜是則我有大

造於區夏也重以關土服遠包荆卷蜀功高於九合業重

於三分愈執忠貞之操終以人臣之禮至哉大矣無得稱

焉既而謳歌允屬金石變響神器大寶用集我有周我閔

皇帝乃上膺靈命俯順樂推揖讓而登皇極垂衣而歸撫

運世宗續統克隆洪緒武功文德騰茂飛英我高祖武皇

帝以上聖降下武以至道弘丕業其寂也象繫不能究其

微其動也雷霆不能比其變偽齊竊據中原綿歷世紀一作

帶之以巨海長淮鎮之以峻岱崇岳其地廣其民衆其俗

富其兵強而帝遷明德人思睿后金鉞一麾廓然大定申

甲伐之義答億兆之心陟方之駕雖遠鼎湖之神未絕天

元皇帝負四聖之休烈協千載之昌期懸金鏡振玉鼓宏

天網廣地絡東窮海外西極河源邛管夜郎之所冒頓呼

天三

文苑六百四十五

十二

時茂

厨之類莫不屈膝稽顙泛水梯山被華夏之仁風仰中國之

聖道唯彼揚越獨為匪民葦苳魚鳥之郡晏安龜蛇之穴故偽魁

陳霸先火耕水耨之夫葦門圭竇之子無行檢於鄉曲充

部隸於藩候施彼呼船之伎展其盜裘之用值蕭氏喪亂

金陵擾攘爛羊啓邑拔卒為將遂得洗濯江漢奮迅泥滓

王僧辯秉文經武挹義懷仁志在鷹揚誠深鶴立掃江表

之巨寇復梁室之宗社提挈霸先成其羽翼而背恩忘德

毀器折枝密相奄襲忍加屠害節士為之扼腕名臣所以

涕流蕭方智世有江外實主梁祀霸先義則臣民任惟輔

佐御下暴於戾虎輕上踰於老年疑作牛見左傳苞此禍心遽行篡

弒遂令羣盜歛起宮闈窘迫梁棟之間顛死一作斃鋒鏑之

下既甚南宮絕宋公之脰又過淖齒縮齊閔之筋自古逆

子亂臣窮凶極悖未有如斯者昌實霸嗣積加篡戮殘虐

相襲報復循環陳頊獲自儲宮我之俘隸先朝深弘寬宥
免其豐鼓置之夷邸淹歷歲時芻豢費上林之牧廩郵索
長安之米其兄猜發常山之念屢致誠請國矜孤首之感
以禮遣送頊稟性兇器不義不昵害厥猶子僭其偽位朝
廷遠撫長駕含垢匿瑕遍省不虧輜軒繼路東夏克平威
震淮海乘勝席卷咸請南轅高祖以得原失信義有不取
敢一作懷遠字小理存父大而違盟背惠忽從茲始搖蕩我
邊陲侵軼我彭泗我是以有呂梁之役麾下裴忌程文
秀之輩李緒將元舉之徒束手軍前不可勝計積甲等孤
桐之岫溺卒斷浮聲之流頊長惡愈甚守迷不變據如掌
之地延翹足之頃猶怒臂當轍舉尾支山習黃旗之謬談
忘青蓋之妖說貫盈數盡今實其時加庚子應年金火入
斗天道人事宛若合符混一之期昭然可見寡人不武董

茲戎律內稟帷幄出制天淵部勒諸將雷奔電擊大將軍
龍門公拓拔王述領巴蜀之兵一十二萬出於白帝水陸
俱下大將軍安昌公拓拔則領驍騎五萬濟於南岸循江
東轉梁王舉一國之師盡舳舻之盛發自江陵首尾不絕行
軍惣管上柱國杞國公亮率步騎一十五萬掃蕩山林自東
闕行軍惣管上柱國郟國公士彥領人馬一十萬濟自泗口
徑取廣陵幕府精銳二十萬餘長驅淮水直指江左並同
集石首大會金陵凡此諸軍皆從汧隴驍雄幽并勇俠揆
犀拔象之夫斬蛟挈兕之士上谷漁陽之騎追風嘯雲
荆門鄧塞之舟浮江沿漢象弭飾堂谿之材鷲羽加淇
園之竹旌旗麾電戈劔竟野鼓怒則江湖盪沸叱咤則山
嶽簸跳以此攻城何城不陷以此衆戰誰能抗禦將恐程
門賈霜梧楸與檣櫟同凋岷山火燎天球共珺珎俱盡故

示以禍福冀相全濟陳項若識機知變輿攬轅門當增安
樂之封有加歸命之禮僞公卿已下或中華冠帶流寓
江淮或東南之雋楚世載名位豈安危亂之邦事夷裔
之主良由身居僞網迹淪寇地雖心存魏闕無由自拔故
耳今正文夫轉禍福一作之秋君子見機之日若能投誠進
款展効立功富貴榮華義同俯拾如有不達機運敢拒王
師軍有嚴科刑茲罔赦檄之所到咸共申省

為北齊檄陳文

盧思道

告三江之表僞署君臣將帥州郡邑落士民等蓋聞上玄
垂象列宿拱辰極之尊厚載成形百谷指滄溟之大是以
三五以降哲王敷后遠覃聲教大燁威靈日月之所照臨
俱荷亭育舟車之所通泊咸附象鞮我大齊積德累功開
物成務光宅寰海覆壽蒸民虞夏受終顧有慙德湯武革

五十五

文卷四十五

十四

命未亡盡善滄波已東九譯請吏玉門之右萬里無塵諸華
冠帶之俗肆勤南畝皮服引弓之渠頓顙北闕內外禔福
區宇懾然皇上垂拱巖廊司契而已惟夫太伯之後實號
勾吳少康之裔是為干越江界湫湄如掌之陋塗泥所集
瘴癘是興自昔皇王列壤班瑞春秋之義爵不過子在晉
永嘉運北數極司馬叡眾無一旅播越江濱劉蕭已還多
歷世祀魏氏奄一神州置之度外且西吞巴蜀北據淮淝
善人君子可以為國陳霸先下愚小醜品極輿隸屬揚部
淪胥之日幸梁人殲敗之秋騁其姦回妄自尊大類蠻觸
之戰爭似鰩鮒之跳躍曇頊昏頑賊忍不義不慈剽厥猶
子竊其僞位蜂蠆非毒谿壑易滿事甚楚圍之纓理切吳
光之劔國小地狹虐用其民坑戮侔於屠伯芟夷過於薙
氏加以沉迷麴蘖酣酗終朝澆灌取盡夜以繼晝貨賄公

行政刑不立踈棄良士狎近小人守宰蠶漁子弟荒暴頭
會箕斂杼軸其空災異相仍稻蟹不熟江左黎獻戴目而
視齊之季世實多涼德江淮之間斃爲項有便謂三脊易
求百年可致違卜復諫黷武窮兵兵明徹程文秀之徒並
早經行陣粗有風力彼朝上下繫以存立呂梁之役貫盈
惡稔曾未交綏雲卷霧徹組練塞垣舳舻噓水顧眄之頃
隻輪不歸及周宣馭曆將一淮海荆舒之民奢侈爲怨聊
命偏裨拯其荼毒長江已北若火焚毛是則揚越之地爲
陳孤立卒弊壤蹙邦羸政塞乘奔無轡壁茲非險坐薪待
然方此爲泰司馬消難切馬荷特私任居連率猜狂使酒竊
地外犇曇項背恩棄德是信是使引盜納姦無媿無畏天奪其
魄憑犯不悛緣邊諸城犬羊荐食聖主以軒開萬國屬盡九
州一隅不庭宜置天討爰詔六軍分閫受鉞西徇秦隴之

卷之九

文六百四十五

十五

時表

銳北引燕代之英五校雄兒超乘俱起三河猛士拔距爭
奮虎夫萬隊豹騎千群並骨勇肉飛風驟霧合憬彼江黃
之衆湯矣彭濮之民巨艦高艫順流東指江都壽春之域
扼喉撫背之兵飛龍赤馬絕水南越漢后昆明未足方其
訓旅魏王玄武不能比其肄師以江湖之泥短衣祝髮輕
舠利舸便習者多陳人上迷天意下憑地險所以舉尾支
山怒臂當轅一作轍今荆門銳卒一作士致命前驅淮南義師
賈勇競入揚舲振艦一作兔起鳧飛然則彼之所長我亦兼有
我利涉大川匪旦伊夕江郢運漕兵會商旅東西過絕通
致無由僞朝軍旅或陳誠款密使相尋萑爾危邦表裏携
貳兼弱攻昧今也其時扛鼎蒙輪之卒事均驅兕三禮四
義之將疑作視韓白正一作之旗百道俱進並雲移雷動
大會金陵牙旂暗一作旆映山原金鼓沸天地呼吸則江漢迴

流叱咤則衡疑可拔運岱山而壓春卯引渤海而濯秋螢
當不足等其銷滅譬其齏粉猥以不武謬物戒律上稟廟
堂之謀下資素飽之氣使張悌之魂先遊一作逝北斗呂嘉
之級遠至新鄉漂櫓溺駮孱然已至亂麻積莽可為寒心
僞主若天誘其誠去危轉禍審青蓋之欲歸知蔣山之應
渡銜璧輿攬拜手轅門則上比吳蜀之君不失公侯之寵
陳之百辟卿士編戶黔庶有能深識逆順因事立功亦當
服冕乘軒紆青佩紫疏爵酬庸待以不次王者之師全救
為本萬姓毫釐靡所侵軼勉求多福無待噬臍檄之所到
咸共申省

此檄述吳明徹及司馬消難事以史考之明徹呂梁之
敗在周宣政元年先一年周已滅齊後二年消難方奔
陳又明年周禪隋開皇元年伐陳英華既題作北齊又

文有我大齊之語未詳其誤今兩齊字疑皆為隋當考

侯莫陳悅檄陳蕭摩訶等文

案侯莫陳悅西魏永熙三年卒後隋伐陳
以侯莫陳穎為行軍總管悅疑當作穎

夫文軌未同江湖致阻風雲密邇良用依然肇歲猶寒想
如宜也經始戎務念以勞懷寡人肅稟天策爰征不庭懸
旌秣馬今次楓岸夫時有盛衰運有興滅積德必慶延後
嗣長惡則祚不及遠陳氏往因際會竊有金陵舊瑣承立
遞相屠害叔寶嗣僞彌復忍虐沉酗日增內荒愈甚彫牆
峻宇加錦繡於土木嚴刑酷法陷人物於塗炭諫士喪身
元良鉗口無道之極自古罕聞有一於此何可不滅斯皆
公等所悉素匪寓言我皇誕膺靈命光臨大寶再闢乾坤
重懸日月歷代逋誅之寇曠古不羈之民感我仁風咸沐
至道唯彼吳越猶未革心主上義存字小含以寬大冀能

撫育彼民守其封域而窮兇極暴日就月將士庶無聊人
神共憤乞師繼軌獻款相尋愍彼黎元實與我役已有別
詔止廢僞主之身此外士民咸從蕩滌西自巫峽東達滄
海巨艦覆波濤樓舡出雲霧瓜步六合當心腹之衝渚宮
漢口據上游之勢曲江鎮陽據其要津鐵馬介夫千羣萬
隊攘袂扼腕唯所用之彼國兵士多少備見以寡禦衆理
在非敵救首救尾將何以及況復士無鬪心人懷貳志身
雖擐甲情在倒戈假使穰苴更生孫武猶在亦不能施其
智略況異昔日者乎往者呂梁之師一舉殲滅淮南之地
二旬悉平彼之將帥皆奔走之餘何可用一作及非也世疑公早
涉戎旅備經征行安危之勢如近目前得喪之機若觀掌
內以國家今日之盛僞主若猶可全爲其展効容復可爾
江東難立有識同知陳氏必亡賢愚共見天之所廢誰能

平本三

文六百四十五

十七

時

隋檄陳尚書江惣等文

南北雖殊風雲在望載懷虛遲寤寐爲勞獻歲猶寒比當
清豫臣贊乎國良亦懇勤寡人忝膺朝寄董律專征跋涉
山川今次江際公等文儒自立器用適時冠蓋二世齒德
兼重孔老殊教名墨異家金匱朱韜銀編玉策莫不騰於
舌杪散在筆端遂古成敗之機近代安危之跡照同懸鏡
明若觀火無待指南自應神悟猶恐思之未審差以毫釐

聊煩翰墨略申榘槩自穹昊生民樹之司牧羲軒以降書契可紀咸一姓承五行四海無兩帝漢道去季三方鼎立時惟版蕩世匪休明當塗起而蜀亡典午興而吳滅永嘉喪亂紫宸曠主劉石符姚之儔僞夏僭燕之醜妄塵大寶事乖圖籙魏室乘時北基朔野經始嵩洛未暇江湖有周受命敵非齊氏務在兼并不遑外略蕞爾吳越自相君長竊擬王者之儀妄談天子之氣偷安假息綿歷世祀我大隋之肇開寶祚光有神州皇帝感曜魄之靈應太微之座千年啓聖萬代一時深仁至德寧濟群品越海窮河東漸西被旄頭之屬歷代之羈作我臣民匍匐服裳唯彼江表獨隔皇風夫物極則反否終斯泰郭璞有云年經三百天下大同茲實玄運已定於前聖主膺期而出欲以區區之陳國違上天之眞數其不可存者一也大必苞小天地之

常規明能通暗日月之常理論道德以陶唐而征有苗語衆寡舉海內而當群小在長江舟楫之用矜其積習而山川共有我據上游鼓棹之能吳楚不異高艦巨舫東西萬里扼喉撫背水陸千途彼之兵士不過十萬首尾分布所在危急加以屯戍邊方淹積歲序風雨以爲擲沐蟻虱生於甲冑望我寬仁思倒戈戟通在戎行更成敵國守以時月則魚爛土崩接以鋒刃則鳥驚鹿走理在必然不假枚卜此不可存者二也豐侯好酒實喪厥邦梁伯役民潰其宗社彼之僞主覆車是襲日夜沉湎曾無節度繕造宮室莫知窮已竭四民之產荒縱其心斂百姓之哀以爲已樂寶衣玉食填積後宮短褐麤餼不充編戶一介之善蔑爾無聞五子之歌宛然悉備雖欲勿喪其可得乎此不可存者三也僞主忌能護短酷法淫刑骨鯁之臣盡見踈斥諫諍

之士皆被屠害遐邇結舌衣冠解體人妖鬼恠觸類呈災
稚齒耆年咸知殄滅此不可存者四也以此小邦攝於大
國邊烽夜動照彼都城戍鼓晨嚴震其宮殿累棊十二方
此未危懸縷千鈞比斯非切而莫知憂恐更自驕矜曾無
事大之心專行犯上之志侵軼我邊鄙招納我叛亡國家
爰自受命每從含養躬以隣睦申其聘好冀能守彼宗祊
靜其疆域而長惡益甚縱毒彌深吳會雄稜之人湘郢耿
介之士乞師請命盈庭滿闕帝乃憫然矜彼黎獻授鉞推
轂甲民伐罪已有別詔唯廢僞主之身自餘士庶普從肆
眚向所陳說咸是格言非曰游談共相欺誤且劉叔國納譙
周之計而獲存孫皓用薛瑩之詞而致福此二子者終有
良臣之譽皆無陷君之譏何則所耻者小所存者大若憲
章徃彥聿遵前軌則僞主享封侯之業祖禰延血食之期
江東士民實受其賜公等身保榮貴名垂竹帛豈不美歟
若膠柱不移守迷莫變率其蟻衆一作聚敢拒王師軍有常
刑悔無及矣禍成俄頃宜早圖之使人今還遲有委曲言
不盡意豈復多云揚廣白

文苑英華卷第六百四十五

登仕郎胡 柯 鄉貢進士彭 叔夏 校正

檄二

為李密檄洛州文

為李密檄竇建德文

為竇建德檄秦王文

為李密檄榮陽守郇王慶文

代徐敬業傳檄天下文

為濮陽公檄劉稹文

為李密檄洛州文

後篇作移郡縣書

祖君彥

自元氣肇改闢

一作

厥初生人樹之帝王以為司牧是以義

農軒頊之后堯舜禹湯之君靡不祗畏上玄愛育黔庶

乾乾終日翼翼小心馭朽索以同危履薄

一作春

冰而為

懼故一物失所若納隍而愧之一夫有罪遂下車而泣之

謙德軫於責躬憂勞切於罪已普天之下率土之濱蟠木

距於流沙瀚海窮於丹穴莫不鼓腹擊壤鑿井耕田致之

昇平驅之仁壽所是

一作是

以愛之如父母敬之若神明固用

五十六

能享國多年祚延長久

一作世

未有暴虐臨人克終天位者

也隋氏往因周末預奉綴衣狐媚而圖聖寶胙篋而

一作取

神器及纘戎

一作承

負宸狼虎其心始瞠明兩之暉終干少

陽之位先皇大漸侍疾禁中遂為梟獍便行鳩毒於是罪

禍一作深於莒僕豐酷於商臣天地之所不容神明之所嗟

憤一作天地難容人神嗟憤加以州吁安忍闕伯日尋

後篇作尋戈

劒閣所以

懷凶晉陽於焉起亂

一作與亂

旬人為罄

禮記作磬

淫刑斯逞夫九族

既睦唐帝闡其欽明百世本枝文王表其光大況乃復隳

壞盤石勦絕後篇作瀦維城脣亡齒寒寧止虞虢欲其長久其

可得乎其罪一也禽獸之行在於聚麀人倫之禮

一作體別

於內外而蘭陵公主逼幸告終誰謂黷

音穎

首舜女弟之賢

翻見齊襄之恥逮於先皇嬪御並進銀環諸王子女咸貯

金屋牝鷄鳴於詰旦雄雉恣其于

一作羣

飛相服戲陳侯之

朝穹廬同冒頓之寢爵賞之後篇出女謁遽一作成公卿

宣淫無復綱紀其罪二也平章百姓一日萬機未曉求衣

具晷忘一作食是以大禹不重一作於尺璧光武無一作隔

於反支體此一作是以憂勤深慮幽枉而荒酒後篇於一作酒俾

晝作夜或號或呼號且呼酣一作嗜聲伎常居窟室每藉糟

丘朝謁罕見其身羣臣希覩其面斷決自爾此一作不行敷

奏於焉一作停擁中山千日之酒飲一作酩酊無知名一作襄陽

三雅之盃留連詎比又廣召良家充選宮掖潛為九市親

駕四驢自比商人見邀一作逆旅般紂辛一作之譴為小漢

靈之罪更輕內外驚心遐邇失望其罪三也上棟下宇著

于一作易爻茅茨采椽陳諸史籍聖人本意唯避風雨詎

待珠玉之華寧須綈錦之麗故瓊宮一作崇構尚辛以之

滅亡阿房崛起秦族以之一作傾覆而不遵古典不念前

六一作千四一作文六百四十六一作二一作友

車一作廣立池臺多為營一作宮觀金鋪玉戶青瑣丹墀蔽虧

日月隔閼寒暑窮生人之筋力罄天下之資財使鬼尚難

為之勞人固知其一作不可其罪四也公田所藉一作不過十

畝人力所供才一作止三日是以輕繇薄賦不奪農時寧積

於人不藏府庫一作而課一作稅繁猥不知紀極猛火屢

燒漏卮難滿頭會箕歛逆折十年之租杼軸其空日有萬

損一作金之用一作父母不保其赤子夫妻相棄於匡床萬邦

戶一作則城郭空虛千室里一作則煙火斷絕一作西蜀王孫之

室翻同原憲之貧東海麋竺之家俄成鄧通之鬼其罪五

也古先哲王卜征巡狩唐虞五載周則一紀本欲親問疾

苦觀省風俗一作乃復廣積薪芻多聚備一作饗餼年年歷覽

處處登臨從臣疲弊供頓辛苦而飄風凍雨聊竊比於前

先一作驅車轍馬蹤一作遂周行於天下秦皇之心未已周

穆之意難窮宴西母以一作歌雲浮東海以一作觀日家苦納

結之勤人阻來蘇之望且夫天子有道守在海外一作華夷不

亂華在德非險長城之固一作戰國所為乃是狙詐之風

非關稽古之法而乃追蹤秦代版築更興廣營一作基址

延袤萬里遂使屍骸遍蔽一作野血流成川一作積怨比於丘

山一作於山川滿號哭動於天地其罪六也遼水之東朝鮮之地

禹貢以為荒服周王棄而不臣示以羈縻達其聲教苟欲

愛人非求拓土又強弩末矢不能理一作穿於魯縞衝風餘

力非敢一作詎能動於鴻毛石田得而無堪鷄肋食一作而何

用而恃眾怙強一作窮強一作兵黷武務在吞併一作唯不

思後篇長策夫兵猶火也不戢則將一作自焚遂使億兆夷

人隻輪莫返夫差喪國寔為黃池之盟符堅滅身良由壽

陽一作春之役欲捕鳴蟬於前不知黃雀於後一作復矢

相顧鬢弔成後篇行義夫切齒壯士扼腕其罪七也直言

啓沃王臣匪躬唯木從繩若金須礪唐堯建鼓思聞獻替

之言夏禹懸鞶一作鞞一作時聽箴規之美而乃愼諫違卜一作妬一作蠹

賢嫉能直士正人皆由屠戮一作左僕射齊國公高頌上柱

國宋國公賀若弼或文昌上相或細柳功臣暫吐良藥之

言翻加屬鏤之賜龍逢無罪遂一作遭夏癸之誅王子何辜

濫被商辛之戮遂令君子結舌賢人鉗一作口指白日而為

八也設官分職貴在銓衡察獄問刑無聞賂一作鬻而錢

神起論銅臭為公梁冀受黃金之蛇孟他薦蒲萄之酒遂

使彝倫攸斁政以賄成君子在野小人在位積薪居上驗

言無信不立用命賞租義豈食言自獨夫一作嗣位每歲

六十一
宋史卷四十六
三
東坡

行幸南北巡狩東西征伐至於如浩豐陪蹕東都固守作

守闕鄉野戰馬門被一作圍自外征伐夫不可勝紀既立

功勳須酬爵賞一作而志懷翻覆言行浮詭臨危一作則

勳賞懸授克定則絲綸不行異商鞅之賚一作金同項王

之刊印芳餌之下必有懸魚惜其重賞求其一作死力走

九逆坂壁言一作此非難凡百驍雄莫一作不離忿至於死夫最

爾宿諾不虧況一作在乘輿二三其德其罪十也有一於此

未或不亡況四維不張三空漢三空見後惣萃一作無小

無大愚夫愚婦共識般亡咸知夏滅聲南山之竹書罪未

窮決東海之波流惡難盡是以窮竒災於上國猥偷暴於

中原三河縱封豕之貪四海被長蛇之毒百姓殲亡殆無

遺類十分之一作計才一作而已蒼生凜凜一作咸憂杞

國之崩赤縣一作嗷嗷俱愁歷陽之陷且國祚將改必有

六十七文苑六百四十六

常期六百喪般一作之年三十終姬之數一作姬終之世故讖錄

皆云隋氏三十六年而滅此則厭德之象已彰代終之兆

先見皇天無親唯德是輔况乃攬槍竟天申繻謂之除舊

歲星入井甘公以為義興兼以朱雀門燒正陽日食狐鳴鬼

哭川竭山崩並是宗廟為丘墟之狀荆榛是庭旅之事宗廟

為墟之妖荆夏后一作則災疊非多般人則咎徵更少

牽牛入漢方知大亂之期王良策馬始驗兵車之會今者

順人將革先天不違大誓孟津陳盟一作景亳三千列國

八百諸侯不謀而同辭不召而自至轟轟隱隱如霆如雷

雕虎嘯而谷風生應龍驤而景雲起我魏公聰明文神武

齊聖廣淵惣七德而在躬包九有一作而挺秀一作周太保

魏國公之孫上柱國蒲山公之子家傳盛德武王承季歷

之基地啟元勳世祖嗣元皇英華作之業篤生白水日角之

皇室

相更一作便彰載誕丹陵天寶之文斯著加以姓符圖識一作

名協歌謠六合所以歸心三靈於焉所以一作改卜文王厄於

姜里赤雀方來高祖隱於碭山彤雲自起兵誅不道赤伏

至自長安後篇作安平鋒銳難當黃星英華作出於梁宋英華作九

五龍飛之始大人豹變之初歷試諸難大敵彌勇上柱國

司徒東郡公翟讓功宣締構翼亮經綸伊尹之贊一作佐成

湯蕭何之奉一作輔高帝上柱國惣管齊國公子孟讓柱國歷

城公孟暢柱國絳郡公裴行儼上大將軍左長史邴元真

等並連籌千里勇冠三軍擊劔則斬蛟截鼉一作截蛟斷鼉彎弧

則啼一作吟猿落鴈韓彭絳灌成沛公之基寇賈吳馮奉蕭

王之業復有蒙輪挾輶之士拔距投石之夫冀馬追風吳

戈照月一作日魏公屬當期運撫茲後篇作億兆躬擐甲胄跋

涉山川擲風沐雨豈辭勞倦遂興一作起西伯之師將問南巢

之罪百萬軍一作成旅四七為名呼吸則河渭絕流叱咤則

嵩華自拔以此攻城何城不克一作陷以此擊陣何陣不摧

壁猶決滄海而灌殘螢英華作舉崑崙而壓小卵鼓行而西

進一作百道俱進一作前以四一作今月二十一日屆於東都而昏

朝文武留守段達韋津等昆吾惡稔飛廉姦佞尚一作迷

天數敢拒義師一作兵驅率醜徒衆有十萬迴洛倉北遂來

舉斧於是熊羆角逐貔虎爭先因爾一作其倒戈之心乘我破

竹之勢曾未旋踵瓦解冰銷坑卒則長平未多積甲則熊

耳為少達等助紂一作桀為虐嬰城自固梯衝亂舞徒設九

拒之謀鼓角潛一作將鳴空凭一作憑百樓之險鷲巢衛幕魚遊

宋池殄滅之期匪朝伊夕一作暮然興後篇作迴洛虎牢國家儲積

我並一作已先據為日久矣又一作既得迴洛復一作取黎陽天下

倉廩後篇作倉儲盡非隋有四方起後篇作義萬里如雲足食

足兵無前無敵裴光祿仁基雄才上略一作將受服東一作專征

遐邇收憑安危是託乃識機知變遷虞後篇事夏表謙擒

於自一作英華藍水張須陁獲在滎陽實慶戰歿於睢陽一作淮南郭絢

近秉戎律略地東南師之所臨風行電擊安陸汝潁一作南則

隨機蕩定淮安濟陽英華作淮則俄然送款徐圓朗已平魯郡

上柱國東平孟海公久一作又破濟陰於是海內英雄咸來響

應封民瞻取平原之境郝孝德據黎陽之倉李士才一作雄虎

視於長平王德仁鷹揚於上黨滑郡公李景考功郎中房

山基發自臨榆一作渝劉興祖起於北一作白朔崔白駒自在潁川

起房一作方獻伯以譙郡來各擁數萬之兵俱期牧野之會滄

溟之右函谷之後篇東牛酒隘一作獻於軍前壺漿迎一作盈於道

左諸君等並衣冠華一作世胄杞梓良材歆神靈澤一作神之

秋裂地封侯之始豹變鵠起今也其時鼉鳴龜一作龜應見

機而作各宜鳩率子弟共建功名耿弇後篇之赴光武蕭

何一作宗之奉高帝當以一作止金章紫綬軒華一作華蓋朱輪富貴

以重當年珪璋一作忠貞以傳奕葉豈不盛哉若隋代官人同

夫桀犬一作同吠尚荷王莽之恩仍懷蒯瞶之祿一作漢審配

死於袁氏不如張郃歸曹漢書范曾一作增困於項王未若陳平從漢

魏公推以赤心當加好爵擇木而處幸一作令不自疑脫其猛

虎猶與舟中敵國夙沙之民共縛其主彭寵之僕自殺其

君高官上賞即以相授如暗後篇於成事守迷不返崑岡

縱火玉石俱焚義等噬臍悔將何及黃河帶地明余旦旦

之言皎日麗天知我勤勤之志一作意布告天下一作海內咸使

聞知

一作皆舊唐書李密傳

此篇六百八十三卷書門重出今已削去

此篇六百八十三卷書門重出今已削去

為李密檄竇建德文

房彥藻

公逸氣縱橫鷹揚河朔引蘭山之驍騎驅易水之壯士跨
 躡燕齊牢籠趙魏好通戎狄聲振華夏昔隗囂之居隴上
 非不險也項籍之據彭城非不強也然而援無所恃躬違
 歷數遂使楚徒歔歔於垓下秦泥不封於函谷故託身得
 地竇融保西河之功協契非人劉表喪漢南之業魏公英
 雄電逝類晨風之拂北林率土星奔甚涓流之赴東海今
 隋主拘囚於世充身制於朱粲白旗之首已懸烏江之船
 未艤去月二十日惣管兵馬會同黎陽莫不投蓋蒙輪賈
 勇求敵遠懷歸義分討不庭公能觀火鹿臺枉道垂報或
 以冀方猶梗願協力齊盟南臨則黃河可清北指則幽雲
 自卷公之遠度宏規高勳茂績必將俯盼伊呂吞併韓彭
 自餘碌碌復何足數絳灌尚警干戈未戢想軍旅之事各
 有司存指蹤之勞無疲於明鏡也內懷悃款形於翰墨情
 之所寄言不能適

五三六

文苑六百四十六

十

天

為竇建德檄秦王文

孔德紹

建德帥眾度河與王世充相接陸運軍糧汧
 河而上舳舻相繼首尾不絕水陸並進築城
 營壘於成臯之東見號三十餘萬陰
 令人與王世充相約乃遣秦王書

夏王敬問唐秦王彼朝發跡太原奄有關內鄭氏光啓伊
 洛崇建宗社予則創基燕趙包舉山東鄭國何辜興師致
 討深懷固存不憚濡足方今千乘雷動萬騎雲屯投石拔
 距蒙輪擊劍統三燕之義勇驅六齊之雄傑制勅敵如拾
 遺殄高墉若摧朽鄭都鞠旅誓眾雪讎我師躍馬礪
 戈克蕩氛祲彼則外無救援內絕軍糧將聽楚歌之聲方
 見峻陵之哭若能反鄭國之侵地守秦川之舊邦更修前
 好不乖來請

為李密檄滎陽守郇王慶文

魏徵

見隋書郇王慶傳

密既屯鞏洛東得黎陽河南郡縣莫不響應唯滎陽不下王即隋之宗室故鄭密以一城之地不足以動大兵先命行人開陳禍福

早挹芳猷未諧披展其為翹佇興寢增勞寒勢轉嚴比得清吉及處危城無乃憂悴自猜隋書作昏狂嗣位多歷歲年利

削黔黎隋書作生民塗毒一作炭天下瓊室瑤臺之麗未極驕奢

糟丘酒池之荒非為淫亂加以違忠臣之諫從婦人之言

殺戮忠良一作良多科稅無已是以蝟毛而起豹變其文共舉

義旗同隋書作戡翦凶虐今者屯營鞏洛開發太倉賑卹飢羸

咸從充徼吳戈電照隸首筭而無窮冀馬雲屯弘羊計而

難盡是以八方並湊隋書作同德萬里俱來莫不期入關以亡

秦爭度河而滅紂東窮海岱南泊江淮凡厥遺黎隋書作人承

風慕義唐公起兵黎疑作晉陽兵一作軍臨灞岸三秦父老千里犒師

叶義同心共為掎角元寶藏武陽興義即取黎陽燕趙之

郊來蘇成詠唯滎陽一郡仍隋書作王獨守迷愛以宗盟尚疑

銜壁敬陳鍼藥冀愈膏肓夫微子紂之長隋書作元兄親隋書作族

寔為重項伯籍之季父戚乃非踈然其隋書作猶去朝歌而處

周背西楚而歸漢豈不眷戀宗祊留連骨肉但為識寶鼎

之遷隋書作將移知神器之先改河決不可壅樹顛不可維所

謂玄覽通人明鑒君子者矣而王之先代家住山東本姓

郭氏乃非楊族只隋書作止為宿與隋朝頗隋書作先有勳舊遂得

預沾磐石遂隋書作名在葭葦婁敬之與漢高殊非血胤呂布

之於董卓良異天親芝焚蕙歎事不同此又王之昏主心

若虎狼儲忿同胞乃甚隋書作有逾沉闕惟勇及諒咸罄禮記作罄甸師

魏文之毒任城漢武之鳩河獻假使宗祧是一踈不間親

況乃族類為非有何疑阻隋書作何能自保王之為臣無所獻納不

能曲突徙薪除煩去惑致令四海鼎沸百姓亂麻高壘深溝自固而已藩屏之寄豈若是乎欲免大責其可得也為

王計者莫若舉城從義開門送款識機知變足為美談乃

至子孫長守富貴十六字隋書作安若太山高枕而卧長守富貴足為美談乃至子孫必有餘慶

今王世充屢被摧破偷存漏刻段達守東郡窘迫自

救無聊隋書作今王世充屢被摧破自教無聊偷存畧世刻詎能支久段達韋津東都自守何暇圖人

充朝亡彼隋書作達便夕死又東都荒酣酒色六字隋書作江都荒酒流

宕忘歸內外崩離人情隋書作神怨憤上江米船皆被抄截士卒飢餒半菽不充事切析骸義均煮弩舉烽火於驪山諸

侯莫至浮膠船於漢水還日未期近得朱粲啓詞銳師百萬以破襄陽惣帥熊羆沿流東下剋期指日定滅江都分

項籍於五侯切王莽於千段王獨守孤城援絕隋書作絕援千里

餽糧之計僅有月餘弊卒之多才隋書作纔盈數百何以隋書作有何

恃賴欲相拒抗飛隋書作求枯魚於市肆即是未遙因歸鴈以運糧竟知何日然城中雄隋書作豪傑王之腹心思殺長吏將為內應

隋書只恐禍生七首隋書作發蕭牆柱隋書作空以七尺之形隋書作軀徒

隋書賞千金之購可為寒心可為酸鼻者也今魏豹百萬馬首欲東唯待王世充破了鼓行東邁梯衝亂舞鼓角潛鳴笑

號叔之死馬疑作焉左傳制巖邑也號叔死焉制在隋屬榮陽郡悲襄陽疑作城漢書襄城無雉類之噍類

代徐敬業傳揚天下文

駱賓王

偽臨朝豺豕行武氏者集本文粹並作人作性非和順舊唐書偽周武氏者

地實寒微昔充太宗下陳曾唐書作嘗以更衣入侍洎乎晚歲諸本

節穢亂春宮密文粹作潛隱先帝之私陰圖後房唐書作庭之嬖入

門見嫉蛾眉不肯讓人掩袖集作袂工讒狐媚偏能惑主踐集作

元后於翬翟陷集作致吾君於聚塵加以虺蜴為心豺狼成

性近狎邪僻殘害忠良殺姊集作子屠兄弑君醜母人神之

所同集作共嫉天地之所不容猶復包藏禍心窺竊神器君

之愛子幽之于唐書作於別宮賊之宗盟委之以重任嗚呼霍

子孟之不作朱虛侯之已亡燕啄皇孫知漢祚之將盡龍

漦帝后識夏庭之遽衰敬業皇唐舊臣公侯冢胤奉先君

之成業荷本朝之舊文粹作厚恩宋微子之興悲良有以也袁

君山之流涕豈徒然哉是用一作以氣憤風雲志安社稷因天

下之失望順宇集作遂海內之推心爰舉義旗誓文粹作以清妖孽

南連百越北盡三河鐵騎成羣玉軸唐書作軸相接海陵紅粟

倉儲之積靡窮江浦黃旗匡復之功何遠邊唐書作班聲動而

北風起劔氣衝而南斗平暗鳴則山岳崩頽叱咤則風雲

變色以茲一作此制敵何敵不摧以此圖功集作以斯攻城何功一作城

不克公等或居漢地或叶周親唐書作或家傳漢或膺重

寄於爪牙或受顧命於宣室言猶在耳忠豈忘心一抔之

土未乾六尺之孤安在文粹作何託儻能轉禍為福送往事居

共立勤王之功文粹作圖無廢舊文粹作大君之命凡諸爵賞同指

唐書作裂山河若其集作或眷戀窮城徘徊岐路坐昧先幾之兆

必貽後至之誅請看今日之域中復文粹作竟是誰家之天

下移檄州郡咸使知聞

為濮陽公檄劉稹文集作書李商隱

足下前以肺肝布諸簡素仰承復命猶事枝詞夫豈告者

之不忠抑乃聽之而未審擇福莫若重擇禍莫若輕一去

不迴者良時一失不復者機事噫嘻執事誰與為謀延首

北風心焉如灼是以再陳禍福用釋危疑言不避煩理在

易了丁寧懇款至于再三者誠以某與先太師相國俱沐

天光並為藩后昔亡與國今則親隣而大年不登同盟英華作問

未至飯貝纔畢祿衣莫陳乃睽後生遽乖先訓遷延朝命

迷失臣誠不思先穀左傳作穀之忠將覆稟書之族此僕隸之所共

惋集作惜兒女之所同悲況某擁節臨戎援集作拔旗誓眾封

疆甚邇音旨猶存忍欲賣之以為已功間之以開戎役將

祛未寤欲罷不能願思苦口之言以定束身之計昔先太

尉相公常蹈亂邦不從逆命翻身歸國全家受封居韓之

西為國之屏棄代之際人情怙然太師相公集作國以早副

軍牙以從征旆事君之節已著居喪之禮又彰故乃集作前

獎其象賢仍以舊服納職貢賦十五餘年於我唐為忠臣

於劉氏為孝子人之不幸天亦難忱纔加壯室之年奄有

壞梁之歎主上深固義烈是降優恩蓋將顯足下之門為

列藩之式不欲劉氏有自立之帥上黨為辜恩集作姑息之軍

俾之還朝以聽故集作後命其義甚著其恩莫借昨者祕不

發喪已踰一月安而拒詔又歷數旬祕喪則於孝子未聞

拒詔則於忠臣已失失忠於國失孝於家望此用人由茲

保族是亦坐薪言秦巢幕云安智士之所寒心謀夫之所

斷舌矧於僕者得不動心竊計足下之懷執事之論當以

趙氏傳子魏氏襲侯欲以逡巡希恩顧望謀立耳夫事殊

者趣異勢別者跡睽胡不度其始而議其終塞其華而尋

其實願為足下一二而陳之趙魏二侯於其先也親則父

子於其人也職則副戎賞罰得以相參恩威得以相抗義

顯事順故朝廷推而與之今足下之於太師也地則猶子

職非副戎賞罰未常相參恩威未常相抗稽喪則於義爽

拒詔則於事乖比趙魏二侯信事殊而勢別矣此施之於

太師趙魏則為繼代象賢之美施之於足下足下則為自

立擅命之尤得失之間其理甚白又計足下未必不恃太師之好賢下士重義輕財吳國之錢往往而有梁園之客比比而來將倚以為墻藩託以為羽翼使之謀取使以數求細而思之此又非計山高則羝羊自至泉深則沉玉自來已立然後人歸身正然後士附語有之曰政亂則勇者不為鬪德薄則賢者不為謀故吳淠有奸而鄒陽去燕惠無德而樂生奔晉寵大夫卒成分國之禍衛多君子孰救渡河之災此之前車得不深鏡代憲四祖文明繼興當時燕趙中山淮陽齊魯結連者幾姓旅拒者幾侯咸逆天用人背惠忘德據指掌之地謂可逃刑倚親戚之私謂能取信一旦地空家破首裂支分闇者不能為謀明者固以先去悔而莫及末如之何先太尉與李洧尚書齊之密戚楊太保與蘇肇給事蔡之懿親並據要地方州領精甲銳卒

文苑英華四百五十五

十一

振

及其王師戾

集作

止我武惟揚則割地驅人以降送款輸

忠以入非不顧密戚非不念懿親非不思恩非不懷惠直以逆順是迫死生實難能與其同休不能與其共戚故也況足下大未侔齊蔡久未及李具將以其人動於不義僕固恐夙沙之國縛主之卒重生彭寵之家不義之侯更出又計足下當時太行九折之險部內數州之饒兵士尚強倉儲且足謂得支久謀而使安危哉此心自棄何速昔李抱真相國用彼州之人破朱滔於燕國困田悅於魏郊連兵轉戰綿歲經時而潞人夫死不敢哭子死不敢悲何者李相國奉討逆之命為勤王之師義著而誠順故也及盧從史釋喪就位賣隣冀功將乘討伐之時欲肆兇邪之性計未就而人神已怒事未立而兵衆已離以萬夫之長困一卒之手驅轡北闕棄尸南荒而潞之人猶老者捫背少

者扼腕謂朝廷不即顯戮深為失刑其故何哉以從史不

義不暱去安就危眾黜其謀下不為用故也二帥去就非

因傳聞鳩杖之人鮐背之叟知其本末尚能言之則太行

之險固不為勃疑作者之守數州之眾固不為邪者之徒

此又其不足恃也由此言之則何以敗名譽六字集作則以何名隳家

聲何事捨君命何道求士死何計得集作人心此僕者所

以對按忘飡推枕不寐為足下惜為足下危而不知其所

以然也況太師比者養牛添卒畜馬訓兵旁招武幹之材

中舉將軍之令然而輕集作於遠近頗有是非雖朝廷推

赤心弘大度然而不逞者已有乖異集作之說橫議者屢

興勃惡之疑人之多言亦可畏也誰為來者宜其弭之今

足下背季父引進之恩失大朝文誥之令則是實先太師

之浮議彰昭義軍之有謀為人姪則致叔父於不忠為人

孫則敗乃祖於無後亦何以對燕趙之士見齊魯之人耶

又計足下旬月之前造次為慮今茲追改懼有後艱此左

右者不明而咨詢之未盡也近者李尚書祐董常侍重質

之輩並親為賊將拒我官軍納質於匪人効用於戎首久

乃來復尚蒙殊恩皆受郡符咸領旗鼓不能悉數厥徒實

繁豈有足下藉兩代之餘資弄集作數萬之舊旅俛首聽

命舉宗効誠則朝廷又豈以一日之稽遲片辭之疑異而

致足下於不測阻足下之後至集作故事具存可以明驗

幸請自求多福無辱前人護龍旄以歸洛師秉象笏而朝

魏闕必當勳庸繼代富貴通身無為隣道所資使作他人

之福儻尚淹歸款未整來軒集作戎臣鼓勇以爭先天子

赫斯而降怒金玦一受牙璋四馳魏衛壓其東南晉趙出

其西北披距投石者數逾萬計科頭戟手者動以千羣兼

其西北披距投石者數逾萬計科頭戟手者動以千羣兼

驅挽虎唐諱之材官仍率射鵬之都督感義則日月能駐

憤則砂石可吞使兵用火焚城將兼集作水灌魏趣邢郡趙

出洺州分二大都之間是古平原之地車甲盡輸於比境

糗糧反聚於他人恃河北而河北無儲倚山東而山東不

守以兩州之殘集作殍抗百道之奇兵比累卵而未危寄

孤根於何所則老夫不佞亦有志焉願驅敢死之徒以從

諸侯之末下飛狐之口入天井之關巨浪難防長飈易扇

此際必當驚地底之鼓角駭樓上之梯衝喪貝躋陵飛走

之期既絕投戎集作散地灰釘之望斯窮自然麾下平生

盡忘舊愛帳中親信即起他謀辱先祖之神靈為明時之

哂集作笑靜言其漸良以驚集作魂今故再遣使車重申

丹素惟鑒前代之成敗訪歷集作事之賓寮思反道敗德

之難念順令畏威之易時以吉日蹈茲坦塗勿餒劉氏之

竟勿汗潞人之俗封帛增款含毫益酸延望還章用以上

表成敗之舉慎惟圖之不宣河陽三城節度使王茂元頓首

文苑英華卷第六百四十六

登仕郎胡 柯 鄉貢進士彭 叔夏 校正

文苑英華卷第六百四十七

露布一

露布一

露布二卷英華所編
失年代先後今正

兵部奏姚州破賊楊虔柳等露布一首

兵部奏姚州破賊設蒙儉等露布一首

為建安郡王武攸宜等平冀州賊契丹露布一首

為幽州長史薛楚王破契丹露布一首

兵部奏姚州破逆賊諾沒弄楊虔柳露布高宗 駱賓王

尚書兵部臣聞北辰集作極列象六合奉天子之尊南面稱

集作乘乾一統成聖人之業是知衣裳所會義有輯於殊隣霜

露所均誠無育於異類故塗山萬國誅後至者防風丹浦

一戎綏集作緩前禽者就日然則陳集作利弧矢以威天下法

雷霆而集作以震域中四時行焉天道不能去殺五兵備矣

皇業所以勝殘雖事切救焚苟順時而濟物恩深祝網不

獲已而用兵伏惟皇帝陛下登翠媯以握圖憲紫微而正

象玄功不宰混太始以凝神至道無名佇華胥而得夢闡

文教以清中夏崇武功以制九夷環海十洲通波太液之

水鄧林萬里交影甘泉之樹反踵穿肯之域襲冠帶以來王

竒肱儋耳之首奉正朔而請吏逆賊蒙儉和舍等浮竹遺

胤沉木餘苗邑殊禮樂集作義之鄉人習貪殘之性日者皇

明廣燭帝道遐融頗亦削左社而被朝衣解推髻而昇華

冕而豸狼有性梟獍難馴遂敢亂我天常率九種集作變九

後漢乃哀牢夷之先也而背誕負其地險携七部以稽誅搔動集作亂邊疆寇

集作攔州縣集作郡是用三門授律長驅無戰之師五月渡瀘深

入不毛之地去月二十一日軍次三肫崑崙鎮前後捕得

生口知守捉山羌傍山連結十部蠻有徒五萬眾此山即

南郡中之巨防也岡巒千里西通大荒之外集作郊谿谷萬

重南極炎洲之境聳喬林而插月陰兔集作靈有假道之標

拔崇巖以隱天陽烏無迴翼之地峯危束馬路絕懸車賊

據臨岱集作代之形乘建瓴之利集作勢徵風召雨蝟起蜂飛

驅雜種以挺妖集作災封狐千里肆沉黎而作孽雄虺九頭

臣以為制敵以權柔遠者理或存於德教伐叛以義決勝

者不必在於干戈於是廣布朝恩恭宣帝澤申之以安撫

曉之以存亡信重蠻陬無負黃龍之約賞隆漢爵不踰白

馬之盟而地接丹見司馬相如喻蜀文集作周駝詞屢殫於喻蜀俗通盤瓠

聲不輟於吠堯臣遣左三集作二軍子惣管寧遠將軍前守右驍

騎萬安府長史折衝都尉上柱國劉會基率檢校果毅驍

騎尉井陘縣開國男劉玄暕等銜枚遠襲卷甲前驅偃危

旆而設潛兵疑從天落乘間道而掩不備集作若似出地中

又遣右三集作二軍子惣管明威將軍行右集作左武衛翊府

中郎將上柱國高奴弗率左武衛天水府折衝都尉張仁

樣集作操等涉集作陟南山之南衝其要害之路又遣左一軍

子惣管前右金吾衛翊府左郎將上柱國孫仁感率衛尉

府右集作左果毅都尉王文雅等陵北山之北絕其飛走之

途賊首領楊虔柳諾没弄諾覽斯等振螳螂之力拒轍當

輪肆集作縱蚊蚋之群彌山滿谷劉會基高奴弗孫仁感等

並忠勤克著智略遠聞識明君之重恩輕生有地提太阿

之雄集作神劔視死無時彎弧而兇黨土崩舉刃而妖徒瓦

解集作危危茗見荀子英華作帖危沸鼎未窮梟首之誅救死扶傷猶致折骸

之請二十二日臣遣副總管兼安撫副使定遠將軍前左

驍衛翊府中郎將令狐智通率右武衛良將壯府左果毅

都尉韓惠德等擁貔豹之雄順天機而右集作左轉遣管內

安撫副使朝議大夫使持節守銀州刺史上柱國宜春縣

開國子李大志率前左武衛靜初集作福府右果毅都尉上

柱國陳弘義等驅集作率象犀之卒乘地軸以右迴又遣行

軍司馬朝散大夫守雋州都督府長史上柱國梁待璧集作碎

率守右金吾衛右宜昌府果毅都尉閻文成等摠投石技

距之材蹈中權而拊其背又遣前守右威衛龍西府果毅

都尉康留買等騰躍鐵歎金之騎犯前矛集作茅而扼其喉

臣等率守左衛清官府左果毅許懷秀等橫玉弩以高臨

縱金鉦而直進玄雲結陣影密西郊赤堇揮鋒氣衝南斗

颺煙塵集作塵埃而匝集作布地白日為之晝昏積氛侵以稽天

蒼冥為之晦色兵交刃接鳥散魚驚自卯及申追奔逐北

斬首千餘級轉戰三十里激流膏而為泉似變萇弘之血

委亂骸而擠壑若沉鼈令集作若之屍既而照盡高春雲

昏乙夜賊乃收集餘眾深集作保據重巖百度彼遊魂慮其

宵遁使三軍齊進四面合圍二十三日乘魚爛之危啓虵

形之陣揚麾誓眾杖節訓兵一鼓先登賞必懸於芳餌九

攻失律罪無赦於嚴誅五都集作部材雄三河俠少或生居

燕地尤工即墨之圍或家本秦人早習昆明之戰叱咤則

江山搖蕩慷慨則林壑飛騰舉鵬翼集作力以揚威曜犀渠

而賈勇澄氛廓侵回夏景以潰春冰滅跡掃塵若霜風之

卷秋籜戰踰百里時歷三朝前後生擒四千餘人斬首五

千餘級諾沒弄楊虔柳等殞死集作元行陣懸首旌門蒙儉

和舍等委眾奔馳脫身挺險雖復刑以止殺丁壯咸伏於

誅夷禮不重傷班白必存於寬宥昔魏臣伐集作賦蜀徒聞

蒟醬之竒漢使開邛纒通竹杖之利豈若膺紫泥而弔

伐指丹徼以臨戎一戰而孟獲已擒再舉而哀牢授首斯

並皇威遠暢廟略遐宣奉立德集作猷以配天徒知帝力掩

黃集作輿而闢集作地豈曰臣功無任集作慶快之誠集作謹遣某奉露布以聞軍資器械別簿條上

兵部奏姚州破賊設蒙儉等露布 前人

臣聞七緯經天星墟分張翼之野八紘紀地炎洲限建木之鄉西距大秦雜金莖而孕氣南通交趾枕銅柱以為隣俗帶白狼人習貪殘之性河淪赤虺川多風雨之妖水積炎氛山涵毒霧竹浮三節肇興外域之源木化九隆頗為中國之患年將千祀代歷百王鄭純之化不追孟獲之風逾扇故三年疲眾徒聞定竿英華作之譏五月出師未息渡瀘之役然則大人拯物上聖乘期法軋坤以握樞體剛柔而建極知仁義不能禁暴設刑網以勝殘知揖讓不可濟時用干戈而靜亂伏惟皇帝陛下祥禽載玉集作出集作地軸以登皇道契書集作繩掩天紘而踐帝玄雲入戶纂

五九二

文苑六百四十七

四

母

靈慶集作於丹陵蒼籙集作昇壇薦禎圖於翠渚垂衣裳

以朝萬國崇玉帛而禮百神昭儉防奢露臺惜中人之產

宣風布政明堂法上帝之宮致群生於太和登品物於仁

壽四神踐雪五老飛星君園祥麟樂班文於仙樂集作女

牀鳴鳳韻歸昌於帝梧四隩同文五風異色配林萬里纒

疏苑囿之原集作層城九重未浚集作池隍之域合璧集作

六照臨之地候月歸琛大鑪覆載之所集作占風納賚蠢

茲夷集作貊敢亂天常橫赤標集作以疏疆背朱提而設

險石林萬仞巖邑千重集作望秦阜以相傾峻陵失四塞

之阻對梁山而錯峙劒門成一簣之峯自謂絕壤幽集作

荒中外足以迷聲教憑深負固江河集作可以逃靈誅殊

不知玉弩垂芒涵集作水無九嬰之沴瑤階舞戚洞庭有

三苗之墟臣等謬以散材忝專分閫白招乘候順秋官集作

以揚旌絳節臨邊通夜郎而解辦自營開舊穴旆轉邛川

峻岐折坂之危盡亡衿帶滇池漏江之固曾莫藩籬唯逆

賊設蒙儉等未革狼心仍懷豕突陸梁放命旅拒偷安地

城集作接祠雞竟無心集作於改旦山多神鹿終未息於擇

音英華作陰杜預注左傳通用臣以大帝宣威有征無戰明王杖順先德後刑

弘集作聖澤於中孚緩天誅於大造庶南薰解愠仰雲關集作

以翔塊東律和集作音扣轅門而啓集作頽而祝禽踈網

徒開三百之恩毒虺挺妖愈集作肆九頭之暴乃鳩集餘

衆蟻結兇徒僖耳推髻之渠千里霧合鑿齒雕題之孽一

呼雲屯壘集作石菌以開營拒巖椒而峻壘崇巒切漢若

登藏寶之山絕壑憑霄似瞰封泥之谷去前集作月十七

日連營布陣據集作險揚兵東西三十餘里馬步二十餘

萬聚蚊蚋而合集作響聲若雷霆縱虵豕以為群氣稽宇

宙臣遣中郎將令狐智通等擁拔山超海之師當其步陣

遣銀州刺史李大志等以集作躍景騰雲之騎乘其馬軍

遣舊州都督府長史行軍司馬梁待璧集作等領勁卒二

千絕其飛走之路遣臨原集作府果毅馬仁靜等勒精兵

九百斷其潛伏之軍臣率行軍長史韓餘慶等負霜戈而

直指掃雲陣以長驅庶令斬馘七擒將士挾雷公之怒伏

屍百萬集作蠻夷識天子之尊集作於是三略訓兵五申

誓衆先登陷敵唯標集作大樹之功後拒亂行必致曲梁

之罰楚人三戶蜀郡五丁氣擁玄雲精貫白日喑鳴則乾

坤搖蕩呼吸則海岳集作沸騰列旗影以雲舒似長虹之

東指橫劔鋒而電轉疑大火之西流刃接兵交洞宵達臆

自辰踰午魚爛土崩沸殘息於層峯更切守陴之哭積圓

顛於重阜殆成京觀之形集作唯賊帥夸于未悟傾巢之

六四 又卷六百四十七 五

非敢懷拒轍之心獨集作率馬軍平川轉鬪驚塵亂起六

合為之寢光殺氣相稽四溟為之集作變色副惣管李大

志忠惟徇國義則忘軀臨危而貞節愈集作明制敵而機

謀集作獨遠丹誠自守雖九死其如歸白刃交前豈三軍

之可奪投袂則妖徒霧廓塞旗而逆黨冰摧集作廩君之塊窮

是乘利追奔因機深入困獸猶鬪似化集作廩君之塊窮

鳥尚飛如驚杜宇之魄斬甲卒七千餘級獲裝馬五千餘

疋僵屍蔽地集作臨赤坂而非遙流血洒途視丹徽而不

以集作遠首領和舍等並計窮力屈面縛軍門寬其萬死之

誅弘以再生之路唯蒙儉脫身挺險委集作命窮山顧巢

穴以集作靡依延集作晷漏其集作何幾况妖徒革面荒

日可期集作外非復他人部落離心舟中皆為敵國瞻言梟首指

丘懷戀疑臨舊國之墟安堵知歸集作似入新豐之市集作

然後班師遯水振旅禺山建鴻業集作於武功暢玄猷於

文教庶荒陬襲中邦集作之禮邊疆息外寇集作之虞華

人一作祝堯兆皇基於千歲集作夷歌頌漢美王澤於三

章豈與夫天帝前星廣賜秦公之冊坤元益地遙開王母

之圖蓋亦有云曾何足紀斯並玄謀廣達集作妙略遐覃

一戰集作而荒憬肅清再鼓而邊隅底定豈臣等提戈擐

甲克全百勝之功杖節揚麾能通九變之策謁藁街而獻

捷集作大帝成規聞杖杜以勞還小臣何力不勝慶快之

至謹遣行軍司馬朝散大夫守雋州都督府長史上柱國

梁待璧集作奉露布以聞軍資器械別簿錄上

為河內郡王武懿宗集作平冀州賊契丹等

露布按新唐書神功元年武懿宗為神兵道大張說

總管討契丹一本作建安郡王武攸宜非

張說

張說

張說

張說

張說

大惣管右金吾衛大將軍兼檢校洛州長史河內郡王臣
某前軍惣管行左衛翊府中郎將上柱國定陽郡開國公
臣楊玄基行軍長史朝奉大夫守給事中護軍臣唐奉一
行軍司馬通議大夫行天官郎中臣鄭杲等言臣聞氛祲
薄霄戎狄謀夏則武庫兵動中國有弧矢之威文昌將飛
邊城用金革之事蓋以式遏姦暴大庇黎人震蠻盪夷明
罰耀武者也伏惟天策金輪聖神皇帝陛下仁覆有截化
被集作無外皇圖未臣之黨先帝集作不庭之俗罔不依
被聲教浸潤邕集作熙望雲向風密邇遐裔而契丹凶醜
奴隸餘集作苗非冒集作頓之雄族異單于之貴種徒以
錯居遠郡漸化平時田牧混於四眊貿遷通於三市集作
戍人集作解甲邊馬垂轡禽獸飽而忘恩蜂蠆養而恣集作
毒敢孤亭育自絕生成乃狼心干紀鴟誼竊發虐我邊吏

五十六

文苑上四百四十七

七

母

覆我鎮軍大棘殘於夷落孤竹淪於荒虛集作陛下震赫

斯之怒授決勝之符天地合謀鬼神助伐六狄舉國百蠻

整衆運攬槍而掃除縱裂集作缺而焚蕩臣飲冰受斧指

日揚麾雖謝河間之學竊慕任城之勇誓將首冒鋒刃

躬先士卒上假神兵之威下定鬼方之罪凶醜狂悖素無

大志因乘便利扇動姦回集作去歲嘗師疑一軍之盡化

今春輕敵見三帥之不歸蟻聚寔繁豺牙益厲結山戎以

四集作寇連島夷而深集作入臣乃廣開形勢大振軍聲

聲集作移告郡邑金湯固守傳檄諸軍犄角相應清邊道大

惣管建安郡王攸宜杖鉞薊門作鎮幽集作國當要害之

地挫犬羊之群高壘深溝卧舊集作營而不動山蛇雲鳥

陣死地而無疑惣管沙吒忠義王伯禮安道買等兵臨易

水使接桑河犀渠衝將集作士之冠集作雕騎落集作將

識

軍之戰集作四面當敵集作九拒乘城御史大夫婁師德

惣管高再集作牟薛思行等扞敵中山折衝外侮訓厲鷹

揚之士輯穆震驚之師其餘部散校分集作離網集作

別緒兵車星布巡太行而綴碣石介馬雲羅挾衡漳而連

海浦山川積雨盡集作消胡騎之塵草木長風咸有王師

之氣清邊士馬稍南驅而擁蹙神兵甲卒漸北逐以威臨

但合圍而持重未輕挑而即戰重以蕃臣默啜統率氍裘

控弦逾於萬騎帶甲彌於千里長驅松漠掩集集作柳城

巢穴是空胎卵皆覆于時賊衆兵馬屯逼幽州聞其塞外

之敗懼有舟中之敵勢力外窘心腹內乖建安郡王攸宜

蓄銳淵唐諱得乘機電發援桴作氣則山岳可搖書箭一飛則

首渠相滅兵纜接刃元凶授首春喉蔽野京觀起於中州

積甲成山組練收於外府雖本根斯拔已蕩滌於一隅而

餘蔓所集作滋尚聯延於數刻集作賊帥何阿小等頑凶

是極屠僧為資受其署置肆行驅集作掠幽陵之下不知

首惡之已擒兩河之間仍謂遊魂之可恃士女遭其迫脇

軍城集作被其屠陷以殺戮為事戶積虔劉之悲以劫奪

為心家盈剝割之痛鹿城縣令李懷璧衣冠貴胄令長崇

班背我朝恩歸誠狄寇潛修甲杖輸以利器之資見委兵

權當其上將之任蠢茲狂亂暫集作同燎火言事剪除方

申沃雪曹劉憲詞臣乃盛兵邢趙塞井陘之隘

命虎賁之將遏其衝突之鋒長史唐奉一馳使洛魏據河

曹之津縱羽林之雄挫其侵軼之勢臣又遣前軍惣管忠

武將軍行左衛翊府中郎將上柱國定楊郡開國公揚玄

基押飛騎營中郎將李釋子惣管雲麾將軍行玉鈐衛翊

府中郎將康國公阿史那毗伽子惣管冠軍大將軍行左

虎
諱唐

文苑卷四十七

八

玉鈐衛翊府郎將宋拔延子惣管冠軍大將軍行左金吾衛翊
府郎將迴鵲集作果別勅行人雲麾將軍康戡誕子惣管

定遠將軍左威衛長李當義壯武將軍何義本子惣管忠
武將軍何集作利深子惣管壯武將軍俱羅罹淮宣威將

軍行左玉鈐衛翊府郎將蘇達侯一作斤度施子惣管定
王府典軍成善威子惣管押飛騎定遠將軍平原府左果

毅長上穆仙童子惣管劉尚珪子惣管渭川府左果
毅鹿思讓押飛騎左玉鈐衛隊正長上賈楚珪左鷹揚衛

長上花匡鼎押飛騎李言忠押飛騎沮忠揚鎮副張元敬
押飛騎康景休押飛騎左監門衛司戈竇九臯別奏右武

威衛長上揚仁爽左武威衛長上楊裔原州崇岡鎮副康
戍一作子右監門衛長上傳阿毛左監門衛長史殷承範

右衛長上王仁獎右衛執戟嚴弘琰右金吾衛羅元讓潭
州花石戍主蘇元暉前右武威衛長鄭嘉祥左衛司戈鄭

彥湊媯州威寧戍主崔思暎押步兵子惣管左玉鈐衛長
上閻弘誓別奏右衛親府校尉長上范思臣右玉鈐衛長

上張中儼別奏首領蘇農娑羅三品子首領宋義本別奏
游擊將軍左玉鈐衛宿衛哥咄施注比別奏鄭思疾左衛

潞川府果毅負外置同正阿史皎子惣管王城府檢校果
毅任弘誓別奏檢校虞倏任處寂別奏裴光嗣等徇其東

北又遣子惣管游擊將軍王鈐左司階伏羌縣開國男李
弘顏子惣管邢州司戶參軍飛鳥縣開國男常元楷子惣

管原州廣牧領將軍元寂子惣管右武衛負外置同正武
元禮子惣管前潞州參軍武其別勅行人張景扶州刺史

舊鎮副崔敬一右武衛中郎將阿史德奉職右鷹威衛將
軍業恤啜刺俟斤右豹韜衛柔遠府長史上果毅吐火羅決

軍業恤啜刺俟斤右豹韜衛柔遠府長史上果毅吐火羅決

斯右金吾衛果毅執失守直右鷹揚郎將負外置同正阿
所那左玉鈐衛長上借緋金元濟東天竺國王子僧伽杖
摩右鷹揚衛郎將僕固郡骨支左金吾衛郎將阿康地具右
武衛威郎將東河察使左豹韜衛高城府長上果毅阿史
德伏摩支右玉鈐衛郎將路驢駒左金吾衛長上阿史德
伏摩支右玉鈐衛郎將路欲谷游擊將軍葛羅杖延游擊
將軍契苾木昆折衝都尉車臯施俟介虔州猶口鎮副白
善德晉州仁壽府果毅侯義威子惣管左武威衛侯伸城
府果毅杜玄隱押後隊長上張德峻天官常選王暉常彥
緯押千騎三交戎主董玄景河州安喬戎主王才龕別奏
康玄寂押千騎隊楊待封前冀州堂陽縣丞温待禮別勅
行人白君詵等略其西南或折衝其前或乘躡其後整鬣
貅之佐奮猛毅集作勇猛之倫長戟林迴高旗雲撓賊黨畧窮

五十七

文苑古首四十七

十

廿

漏急命窄途殫執無全之心投必死之計以今月一日何
阿小等帥不悛之旅擁脇從之衆結聚數萬抗拒官軍自
寅及午前後九陣玄基等並鋒鏑爭先戈鋌遞躍抗足
而趾鮮卑之血塗地攘臂而扔因人蒸切也烏丸之首積野
摧同冰陷裂若山焚窮其子遺無復噍類斬獲逆賊冀州
三品大惣管何阿小逆賊河北道招慰大使冀州刺史馬
行感逆賊冀州道副大惣管楊奉節逆賊冀州長史王弘
胤逆賊惣管劉伏念逆賊十二衛大將軍見任鹿城縣令
李懷璧逆賊信都縣令楊志寂物管胡六郎逆賊惣
管王知先逆賊帥馬明哲逆賊三品惣管姬目等魁首巨
蠹三百餘人所有戎羯憑陵殘毀之處臣皆宣布制旨撫
集其人咸懷聖恩俱得復業群凶既定冀集作四方砥平二
載逋誅一朝泯滅數州怨毒俄然集作爾清弭舞溢河冀歌

連塞垣截風浪以息滄溟廓氛埃而覩白日卻穀集作何

力敢推群帥之勞叔向有言實在明君之德臣憑藉眷略忝

當戎政神機密運不待橫草之功天贊冥符恭承破竹之

勢仗惟集作瞻集作潮勝遠奉朝歡抃躍之情倍萬恒品不勝集作

慶使之至謹遣謙人天官常選李佑別奏左衛長上校尉

張德俊奉露布以聞其軍資器械別簿條上謹言

為幽州長史薛楚玉破契丹露布宗立樊衡

臣聞天地設險聖人則之士生懸弧其來尚矣故黃帝涿

鹿之戰重華三苗之役湯伐有扈文王克崇至於不得已

而用之其實一也伏惟開元神武皇帝陛下乘五聖之資

踞六合之大盛一作德光天下天一作光威振百蠻四方無

金革之事蓋亦久矣蠢茲凶寇東胡餘孽日者關門未

通隔在荒外自相殺戮君臣無序不能獨立交臂屈膝求

五十九
文苑六百四十七

我國家以安之聖朝矜其輸誠且以護塞故列于朝貢編

於鴻臚故再冊名王累降重主魁渠豪首靡不霑渥自開

復營州二十年内部落不聳安農牙商金帛山積我國家

之於惠貸亦深矣而野姓易動狼心不革中復背誕寇我

柳城我是以有平盧之戰當為兵少城孤不暇追北盡其

巢穴殘凶遊魂假氣絕徼自以為黃河涇山可以保天險

懸塞沙漠可以逃靈誅陸梁窮荒迷肆不復我王師遠略

是以有墨山之討其突厥分兵助為聲勢官軍既會萬弩

齊發逆順不敵賢王失陣契丹東龍鍾走林奔穴甌脫不

守髦頭匿光可突于挾馬浮河僅獲殘喘謂其困而知悟

面縛請降而西連匈奴東構渤海收合餘燼窺我阿降奚

我是以有盧龍之師當是時也四蕃雲屯十萬雨集動兵

鼓噪聲聞百里山川晝昏土木皆震勢欲朝驅降戶夕通

河朔我行軍七千乘天假威靈黜之破口斬單于之愛子
燔契丹之積卒衆虜奔逃扶傷不暇於是從散約解雲卷
霧消投戈弃甲莫敢迴視我降戶完然堅利而西蕃輜畜十
遺半矣夫突厥乘天驕兩蕃籍甚銳悍所向得志其來久
矣昔漢高祖以三十萬衆猛將如雲謀臣若兩平城之下
七日不食竟以計免頃萬歲通天中亦忿其不恭雷霆發
怒驅熊羆之卒策貔武之將以數十萬相繼而出沒之峽
中隻輪不返卒使趙定陷沒河北塗炭數十年間瘡痍不
復所以敢輕犯官軍之衆者以往事之驕我國家偏師不
滿七千當十萬之寇綿險提寡揚桴而出勢同解竹兵不
留行於戲前事也如彼今捷也如此哉蓋順人心因神怒
察地利用天時威靈之所覆而逆順不敵也然自黃龍舉
烽無歲不戰驚駭我城柵虔劉我亭戍勞軼我師徒糜耗我

五八十一

文苑卷一百四十七

十一

廣輸實已四稔于茲矣若乘勝不殄無以一戎所以戰士

憤惋餘怒未洩將斬踏躡

史作躡

頓以染鏑血頭曼以豐鼓彷徨北

兵

一作山

望煙塵而不肯返旆者久之臣以為突厥銳而逃

渤海懾懼勢未敢出契丹大戰之後人馬俱羸其心不振
又恃以荒遠必無我虞而諸軍蓄銳久思奮發新聞破賊
無不增氣若驅而襲之可不血刃而取也臣又與侍御史
王審禮節度副使烏知義及將士等僉議咸以為然議猶
未決適會勅令臣討逐臣已準勅書當日宣布三軍之士
莫不踴躍於是拔距蒙輪之伍響應投蓋超乘之卒景集
節度副使右羽林軍大將軍烏知義即令都護裴旻理兵
述職大閱于松林管內勇士萬人驍騾一作驍駒千里拔三丈
者得七十一作千疋輕幟迅走之乘鷹揚貔武之士左羸糧
右持械者日越七百里朝發薊門夕宿碣石者得八千人

勵以威神節以金鼓既而饒樂歸義王李詩衙官可支刺

史伊覓此字無燭祿并里水扶餘如者違未盧東胡雜種君

長之群左射人右射馬翼迅霆轉沙振駢角者二萬五千

餘騎鐵甲霜野朱旗火天遂陵赤山下塞谷絕泱泱橫大

漠以四月二十三日夜銜枚渡黃河質明頓夫松漠漠庭

疾雷暴驚天落地動群兇狂顧周章自失於是三軍橫亘

風偃電掃烏知義都統主一作王中權裴旻領三千騎與宣

慰計會發兵馬使內給事薊思賢副使內寺伯李安達右

領軍衛翊府郎將李良玉軍前討擊副使大將軍鑰高等

為先鋒中郎內供奉李仙壽領馬步五千與宣慰內供奉

奚官局令王尚客內供奉中郎李延光長上折衝史直臣

右驍衛左郎將王抱一經略軍副使左衛率府右郎將李

永定咸寧府軍李車蒙領馬步五千與宣慰使內謁者監

五七八 又死六百四十七 十三

劉玄向供奉長上折衝康太和一作科供奉長上折衝白延

宗長上果毅高處謀永寧府果毅閻鼎臣副將布折等為

右翼中郎將裴債與領馬步五千與攝副使內供奉左驍衛

府郎將抱忠英樂府折衝李瓚等為後殿奚王李詩與內

供奉長上折衝歸州刺史韓仙松衙官段志忠等統其部

屬知虜掠北郡長上折衝兼儒州都督烏承恩與供奉將

軍恩盧庭賓平盧軍攝副使遂城縣折衝相善珍經略軍

副使政和府果毅楊元亨軍前討擊副使果毅路順清夷

軍子將英樂府右果毅樊懷璧等四面雲合煙塵俱起兩

翼掩進前後夾攻數百里間沸聲若雷波駭雲亂窮寇奪

氣僵仆相藉弓不暇張戈不敢振雖蒙茸奔穴町疇走險

輜輹所暨盡為鯨鯢其餘孱幻匿車惕喘穹帳烈火既藝

與煙俱銷者不可勝數或遺奔迸脫扼據峻嶺聚徒嘯侶

擬欲鳴吠而左縈右拂咸在彀中傷烏惡弦舉弓皆落於是韜兵弛甲俯伏請命俘虜蔽於原野羊牛填於坑谷遺械如草流膏成川然後戮渠魁斬封豕責元歸罪祐衆啓降二十五日收獲南驅二十七日次于烏鶻都山前後大小三十一陣旗鼓所向莫不奔潰野絕遺寇萬里肅清然後頓軍休士大閱俘實約生級羊馬駝驢器械都獲三十餘萬口仄頭數其餘瀑潦奔注浮澗涉河揭厲未畢而中流汨沒不入見數者十餘二三所斬丁壯豪健暴骸相藉者亦三萬餘級所焚藝車帳農具器械儲糧老小灰燼盡滅者不知涯極於是椎牛買酒散賞高會宣慰使內謁者監普心寂與判官掖庭局監潘進忠別勅行人李如意等銜命至便申慰諭三軍蹈舞呼聲動天將吏等令驅蠻夷而襲虜庭因寇糧以贍軍用亦降奚所勤懇也伏惟勅

五十八

十四

母

俘虜許戰士奚等內附賞餌因而用之且不踰時禮也羊十六萬口牛四萬頭馬四萬疋車五十乘并生級除留堪進九千人已上餘四萬衆悉降奚旣以蠻夷出攻亦以蠻夷入賞俘獲數廣行程不多自振旅而旋日役數十以今月四日兵馬並平安到平盧蕃漢健兒惟六人損一人死臣聞善戰不陣良將難之臣等不才承命出師遠征勁虜二十三部落並不鈍鋒士馬完歸軍容益振非陛下威神所覆則臣等碎首必然今幸覩洪勳不勝慶使之至謹遣戰將攝副使行軍虞候惣管等檀州密雲府果毅都尉賜紫金魚袋車仙憚奉露布以聞其所獲首級器械別錄申上

文苑英華卷第六百四十七

登仕郎胡 柯 鄉貢進士彭 叔夏 校正

文苑英華卷第六百四十八

露布二

露布二

河西破蕃賊露布一首

兵部奏劔南節度破西山賊露布一首

兵部奏桂州破西原賊露布一首

西平王李晟收西京露布一首

河西破蕃賊露布 玄宗

朝議大夫守左散騎侍郎河西節度經略使營田九姓長
行轉運等副使判武威郡事赤水軍使攝御史中丞賜紫
金魚袋上柱國臣某破蕃賊露布事尚書兵部臣聞背施
怒隣惡貫以滿者天誅之行慶布澤德政以順者人從之
況乎夷背其隣有貫盈之罪王將服叛舉德政之役彼曲
我直何可敵哉蠢茲吐蕃在僻西裔山川禽獸以處之造

四里

一

一車

物者以限之於外區也我國家貞觀之際戎有微服來朝
太宗因而異之啗以金帛終其身不敢近漢邊矣中宗之
享國許修舊好姑務息人乃割愛主以降之至今朝廷無
西顧之患洎我開元天寶聖文神武皇帝陛下嗣宅丕業
文化遐被非不以德和之矣然彼戎以承數代之患晏安
七十年之間而得掠諸夷之種落猶織草之滋蔓因怙其
衆轉以作讎悉國興師犯我河隴天罰有罪大敗其衆旣
而戎有^罪旋悔願得比爲舅甥我皇帝以天地爲心山澤含
垢重使信以綏撫蓋不忍以蠻夷而疲其中國人也噫外
而翼之犬長吠主反伐勃律之屬國匿我四亂之亡人誘
我石堡之城踐我蕃禾之麥多行背德是惡貫^矣我皇帝
怒之密發中詔使乘不虞以襲之臣以統五原之帥擁中軍
之師奉聖略憑天威以今月初戒太初之巖引高牙而出十二

月會于大斗之南擇精騎五千皆蓬頭突鬚劔服之士乃遣都知兵馬使左羽林軍大將軍安波主帥之先鋒使右羽林大將軍李守義副之十將中馬軍副使折衝李廣琛等部之臣自以馬步三千於大斗建康三水張掖等五大賊路爲應接別委行軍司馬大理司直攝殿中侍御史盧幼臨領步兵五百過合黎川爲聲援又使大將軍渾大寧將軍契苾嘉真各領步兵於三水賊境爲犄角波主等將辭臣戒之曰爾豈不聞乎天子之怒伏尸者百萬將軍之權得專誅戮爾須自大斗南山來入取建康西路而歸當吾所戰鋒可斷飛鳥若不剋于敵逗留却一作既非行汝則有大刑雖剋于敵一作故道而還汝亦有大刑緣隴以西賊必知懼縱爲多備亦可鼓行此本出於聖謀縱舉覺必亦無慮諸將乃敢於勇決進不顧身十二日至新城南吐蕃已燒盡野草列火

五八三

文苑六百四十八

二

丁南

如書諸將曰賊果知備矣因躡其烽燧高揭旌旗氣雄雷霆聲疾風雨十五日至青海北界遇吐蕃兩軍遊奕二千餘騎波主乃使先鋒使大將軍李守義領鐵騎一千穿賊之中取背而陣又使先鋒副使郎將安貞領騎二百摩賊之壘斬馘而旋又使中馬軍副使李廣琛領勃律馬騎一千攻其傍又節度惣管李朱師等領兵八百騎亢其下使右馬軍副使張仁賢以遊兵一千彌縫其闕波主自與突將軍雍餘義等領精兵一作卒一千敵其南北東西左右橫集而兵氣初銳馬逸不止弓矢三注而連發長劔四按而無前初淫廢與一作而苟在終蹂踐而皆盡誰爲其後徒言魂魄歸天不報國恩翻聞肝腦塗地則向之爲寇今已殲焉自朝至于日中凡斬二一作三千餘級十六日進至魚海軍千里煙塵百道旗鼓波主已先遣前軍副使折衝傅光

越設伏於便道及交矢石又使節度惣管唐朝英等冠而

一斃

因得戮巨鯨於魚海墜封

豕於鹿泉平積骸成京觀斬魚海軍大使劔具一人生擒
魚海軍副使金字告身論悉諾匝生擒棄軍大使節度悉
諾毅生擒遊奕副使諾匝生擒遊奕副使金字告身拱齋

一作

生擒魚海軍副使銀字告身統牙胡其餘褊裨難以盡備
載斬首三千級生俘千餘人牛馬羊駝八萬餘頭數獲未
畢虜救潛來在山滿山在谷滿谷顧眄之際合圍數重諸
將皆曰兵法所謂致之死地今則是也亦焉能皆陷於虜
廷辱明主之深料乎於是謀夫一心戰士倍力擇強弩長
戟為外拒實輜重生級於其內雖喜獲多急何能保其俘
囚有因動而將變且驅而斬之其虜畜有力極而難致則
擁而焚之候暴夜之時望歸路而突其初也銜枚屏氣鬼

卷八

之苑六百四十八

三

丁南

神無聲既出則奮臂大呼天地搖動暗疑作將馳逐而玄黃

且戰且行一千餘里馬無齧草之所人無抔一作飲之地

共食冰雪傳食糗糧猶能夜盜虜之營使自攻殺朝拔虜
之幟爭為致師凡七八日間約三百餘陣至合河之北斬

得二丈之綏而莽布支更益其銳兵追截我歸路安波主

懼其危迫請救其後軍臣遂遣副使劉之一作儒等領後軍

二千騎迎之會中使駱玄表至臣行軍使善子雄監之同

往救兵既至旌旗相望其氣益振又戰數合虜既不利夜

遂遁逃臣聞軍得歸便牒安波主虜之去也必謂我不能

復追之必出其不意可使安思順反戈却入必盡擒之遂

東疑作精騎二千與之又使副使娑羅度抱一二丈城副使

李可朱副之臣別差大斗軍副使烏懷愿討擊副使

哥舒翰等領精騎一千應之分前麾隨間道蔽山乘夜晨

壓賊營或馬淖其妖夢之時或刃遊于假寐之際死生同
泯不知其云前有朱衣旃裘保而相拒首已飛於異處身
猶僵而兀立不可勝紀其有漏網得逸擐甲復來耻於生
降窮以死決不免戈矛以撞秘而擁坑谷以頽填而就拉
拘十不存一所以擒金銀告身副使三人斬首千餘俘
囚二百餘人獲牛馬羊駝共三千餘頭疋器械新物一萬餘事
謂我再剋而虜再敗矣皆會漢境一如徃哲之朝善一作苦
戰已來人所不覩臣試迹前事行之惟艱且李陵之兵盡
矢窮縶為之虜秦人之勞師襲遠再敗其師未有如今之
深入能勝歸者此乃陛下神斷之謀也聖威之被也不然
豈季冬之月天地嚴凝齎孤軍十月疑作日之糧入絕域重阻之
地橫跳千里連破數軍討而復擒歸而復襲一日三捷震
天聲而凱旋臣獨輯甲兵日討軍實終當拔邏些城青地
斬贊普之首以懸北闕則臣之願畢矣不勝慶快之至謹
遣某官奉露布以聞

劔南節度破西山賊露布

玄宗

楊譚

臣聞天分四序寒暑莫同地裂八方華夷各異言語不達
詎可以政令齊苞茅不供乃可以干戈服黃軒有涿鹿之
戰以定火災顓頊有共工之陣以平水害逖聽前古無能
去兵將用撫柔遐荒混一書軌豈徒勞師玩寇黷武殘人
而已哉伏惟開元天地大寶聖文神武應道皇帝陛下清
靜端極無為體道祖文德而耀昌期則種虜解甲恢武功
而運上策皆慕化之賓惟彼西戎可逃天孽豈謂慈仁廣
覆猶見背陽之禽聲教傍羅尚有吠堯之犬仗以南蠻亂
德恃險偷生吐蕃舉國興兵資其叛逆頃者西山戰士及
八國子弟因其窘迫遂欲憑陵敢懷猶鬪之心來犯必誅

之今以正月五日率故洪臘城裏囊功三節度兵馬八萬餘人分爲六道攻圍萬安柔遠明威平戎及保寧都護府等五城驅牛馬有甚於谷量運干戈實踰於山積萬安城使金吾衛將軍張知海柔遠城使右金吾衛大將軍于仙障平戎城使武衛劉元果明威副使折衝管希光攝保寧都護折衝馬仙童等久戍邊隅備閑攻守或自固堅壁不發懸門或蓄其精銳誘以羸弱賊等不虞設詐競欲登陴再鼓當彼竭之餘一舉得我盈之勢矢石齊發噍類無遺前後殺傷不可勝紀八國招討副使左羽林軍大將軍董當左羽林軍將軍董董旁郎董畢郎右羽林董利董哥弄左驍衛將軍董利峯一作蓬左武衛將軍董奉仇左威衛翊府中郎將先鋒党利才統八國子弟八千餘衆并都護武士府健兒一千餘衆間道設伏潛入深林旗鼓相望晝夜苦

五七八

文六百四十八

五

戰自其月十五日都護武士殺賊衆退散至十七日遂攻合所圍明威柔遠兩城兵馬併力死戰攻萬安新城十八日都知西山子弟兵馬副使左金吾衛大將軍攝臨翼郡太守董郤翹左羽林軍大將軍兼靜郡太守董元智右羽林大將軍兼蓬山郡太守董懷恩右驍衛將軍兼歸誠郡太守董思賢江源郡太守董懿一作懿右驍衛大將軍董仁羅折衝董弄封等領八郡驍勇并蕃漢武士等七千人自蓬娑路取牙山出其不意銜枚夜襲賊等震驚遂相殘戮棄其輜重稍欲抽軍蒼黃之際前後一作剪除略盡漂杵之血方此非少積觀之屍今茲目覩同州節度副使都知兵馬使左羽林大將軍兼通化郡太守譚元受遣左金吾衛將軍裴振攝維川郡長史折衝張粲雲山守捉使折衝姚高保攝天保郡折衝楊夏日攝司馬董元勒一作勤等率健彊三千人自滴博嶺

入競施犄角之勢各陳擒縱之謀自正月五日至二月五日前後轉戰五十餘陣生擒吐蕃哥末國王渠時兵馬副使程步離并士衆等共二千餘人斬獲故節度副使且祿翁都知使乞呂徐男律熙等器械牛馬羊等二十餘萬右威衛郎將康裕昌保寧都護府長史鍾景等恭承將命挺劍重圍宣傳聖恩曉諭將士遂得

賈勇萬夫激節以少克衆實杖天威取亂推亡誠因廟筭今長鯨就戮封豕載屠挑塞放牛徒聞往謀華陽歸馬稀遇聖朝無任慶快之至謹遣威衛郎將楊如海奉露布以聞軍資器械別簿錄上

兵部奏桂州破西原賊露布 肅宗 前人

臣聞聲教無外修文德以來遠人職貢有虧耀武威而討亡命然則五材並用金革爲遏亂之資八卦相宣弧矢乃濟時之具事非獲已道豈爲侔將治衆以安人必除殘而

將治唐諱

文六百四十八

六

丁

禁暴歷覽今古誰能去兵未有捨禮樂而致升平奮干戈而弘大業者也伏惟乾元大聖光天文武孝感皇帝陛下明齊日月德配天地化同異類澤洎無垠寰宇已墜而更興社稷將顛而復振崇勳累績曠古莫儔蠢茲魑魅之鄉敢恃犬羊之衆據其險要恣其寇攘西原羈縻舊梁聲教被其不問二字一作險嘗疑誘引同惡者多僭稱王侯僞署官爵旌旗蔽野鼓角沸天恣殺戮以威人將玉帛而濟衆方圓數千里控帶十八州丁壯並執其干戈子女盡充其僕隸自謂強盛轉加兇頑迫之則鳥散獸驚緩之則蟻結蜂聚老幼奔走耕稼失時萬井無煙兆人失業不賓王化于茲四稔臣前年銜命到州深入招慰示之仁信許其自新猶尚憑陵每行攻劫管內州縣日漸流離村落焚燒廬井空竭伏奉去年三月十日勅遣中使魏一作衛朝璨宣慰凡諸首領皆賜

勅書再三曉諭許其官爵但以炎方人物躁競者多承

已來久絕朝命自蒙提獎感激殊私勩力同心傾家竭產

訓勉子弟策勵甲兵介冑自出於私門糧儲不損於官廩

向非陛下化周動植德及遐荒豈有不勞王師坐清氛祲

去年二月二日睦州武陽珠唐書作朱蘭金溪黃橙等一百餘洞大賊

帥偽號中越王廖殿此下偽號唐書與英華顛錯不同偽號桂南王莫淳偽號拓南

王相友唐書作支偽號南越王莫尋唐書作淳偽號象郡王梁秦唐書作奉偽號鎮

南王羅成唐書作誠偽號戎成王莫濤偽號南海王羅品等潛相結構約

二十萬眾跨壤連州志如梟獍風號雨嘯心等豺狼仍欲先破

嶺南後圖嶺北遠近百姓皆不聊生臣遂激勸將士宣傳

聖旨誘以厚賞使其盡節皆決命苦戰非無損傷不顧危

亡志懷忠勇大首領梧州長史鎮南副都護攝柳州刺史

西原遊奕使張維南勸率首領統茲軍政萬夫齊進一舉

無遺都知兵馬使朝散大夫象州刺史成匝領當管及柳

一作柳州刺史衡州等戰手共一萬人卷其旌旗踰挺爭先

應有渠魁當陣斬獲經略副使朝議郎行賀州長史穆成

構防禦副使朝議郎梧州長史任早梧州刺史本州防禦

使李抗先鋒總管梧州長史秦匡朝四界遊奕使廣州番

禺府折衝譚崇慰及惣管子將等五百餘人并西原環古

等州首領方子彈甘令暉羅承韋張九解宋原等五百餘

人各領子弟并部外義征及惣管内戰手共成二十萬眾

或擐甲仗兵縱其救援或致果決勝扼其喉咽左右夾攻

飛走無路諸將及首領等義在竭誠以死無生以晝繼夜

或攻或圍當其彼竭之餘遂得我盈之勢封豕既戮長蛇

又屠餘黨喧騰自相蹂踐勢如解籜事等摧枯指揮而夷

獠喪氣一作媿叱咤而山川沮色賊等既因失律不知所向

武承裴
敬簡唐書
作武承裴
韋敬簡

或連被墜谷自成積觀之尸或帶刃投江有同漂杵之血
橫行歲久驕縱日深勢如雷霆莫敢拒敵臣乃陳師誓眾
思各忘軀自春徂冬凡經二百餘日前後苦戰各三十餘
陣破賊二十萬衆斬獲五千餘級以頭首喪亡餘黨奔亂
窮滅之後然始求降臣伏以人無盡劉道忌太甚因陛下
好生之德洽陛下至仁之心於是宣傳聖恩示其生路大
賊帥武承裴敬簡等二人餘衆竄伏無地周章失圖解一作
甲轅門面縛請罪臣便脫其桎梏仍加宴賞兼賚疋帛散
於營農各分疆界使其斤埃遞相轄控永絕憂虞今臣管
內亦且寧帖實賴天威遠備疑作廟筭遐臨靜彼兇殘康
茲億兆無任慶躍之至謹遣所部官桂州臨桂縣丞朱璟
謹奉露布以聞其立功將士首領別簿奏上

西平王李晟收西京露布一作破朱泚露布于公異

卷之二十一

五苑之音四十八

八

度

神策軍京畿渭北商華鄜坊丹延等州兵馬副元帥李晟
於苑牆內神廡倉東南連白苑唐書破逆賊朱泚兵馬收復上
都露布事尚書兵部臣聞春司生榮秋司一作殺伐若終
始煦嫗一作殺伐則不能成歲功仁則順成暴則殘滅一作滅絕若
一貫邪正則不能建大中是以一作春秋序行則通天和
而母元氣一作通元和而充氣母一作德刑具舉則協王道而經彝倫亂
由是除兵不可去堯舜禹湯之德統元立極之君或制五
兵或張九伐蓋欲儀剔兇戾一作穰又安一作保生靈補雍
熙之末洽佐聲教之不暨有以然者抑實為焉一作伏惟
皇帝陛下溥博法於乾坤貞明侔於日月陶埏六籍表正
萬邦揚高祖太宗之耿光奉肅宗代宗之不烈自纂承一作
前緒高居穆清率土承有截之風懷生無不遂之性一作
頃者邊鄙或聳干戈爰設有征無戰許蔡僕首領之誅陸

梁背誕涇原生肘腋之變逆賊朱泚所以委身凶德假翻
姦徒熒惑我生人僭賊我神器聚為起穢之物腥彼宮闈
散作旬始之妖孛于躔次先皇帝懷柔河朔敷佑下人錄
其率化之類績一作績加以登朝一作優賢之禮恩澤汪濊集凡
庶之門名器燻灼加闡茸之輦一作質謂革桀跖一作鷲將馴
大和殊不知惡木生槎枿之黃瘿一作瘿狗吠豸牢之主頃
屬鑿與順動郊畿一作圻駐蹕而泚乃嘯兇命醜阻兵安忍
長戟一作戈指闕流矢射天穿高墉以鼠牙毒王師以蠱尾
罪浮一作踰弄泚惡貫梟獍是以萬方糾憤一作憤怒九服罨騰
思齒劔者投袂而興爭傳一作泚刃者不期而會屬賊臣聞
命臣是用祇承眷弄恭行天罰一作計攝衣登壇明君親一作臣
之大義禡牙宜一作饗社假神祇之幽贊以今月二十五日

文六卷四八

九

更一作無物領師徒直趨都邑略灞澹而一作以揚旆瞰囿游

苑一作園而下營土濠一作扶滑切雲舒木柵一作柵林植養威蓄銳

直殄元兇一作兇臥鼓偃旗猶輕小利賊初陵犯略以

師多奚為遂一作遂至二十七日會諸將於中權占勝風於大

旆未鼓而人心粗厲先庚而軍令凝嚴各懷報主之誠一作

報國一作心盡一作爭淬伏讎之刃臣知其可用遂此疾一作長驅五

月二十八日寅時華州鎮國軍節度使駱元光神策行營

商州節度使兼御史大夫尚可孤本軍副使都知兵馬使

御史大夫吳說一作說都虞候兼御史大夫邢君牙京西行

營都知兵馬使檢校工部尚書孟涉右廂兵馬使衛

史大夫康英俊隴州節度右廂兵馬使郭審全又權文成

神策行營商州節度都虞候彭元一作光俊等受一作承命於

神策行營商州節度都虞候彭元一作光俊等受一作承命於

牙旗之下分麾於轅門之外將士等超乘賈勇免胄啓行

夾川陸而左旋右抽抵丘陵而侵一作浸淫布護聲塞宇宙

氣雄鉦鼓陳兵於光泰門外悉一作盡銳於神麿倉東繚垣

空一作摧以成塵滋水涸而為地左廣未歸一作離於舊壘前

偏已交於賊鋒若降於天若一作如出於地賊帥姚令言張

芝一作書作張庭芝等志懷剽一作傑狡心言一作尚憑陵作忠盡謀力則

不及怙亂賊義氣則一作如有餘勢一作同作一作馳眾若蜂一作

集橫列堅陣勢一作旁連高岡猶張蹭蹬之鱗更舉螳螂之

臂衙前兵馬使兼御史大夫王必知牙官兼刀斧將兼御

史中丞史萬頃等自相誓約又令軍行一作合軍聲指麾而貔

一一作兕作威感激而風雲動色遂先登進擊深入合攻七

擒連發而星馳兩翼旁行一作張而雲合霜刃吐一作交光而

揮霍一作霍耀鼙鼓騰聲而隱鱗賊方土崩我乃霆擊乘其蹈

踏一作藉遂至於上蘭取彼鯨鯢直通乎一作於中禁段誠諫

賊之心脊既就生擒涇原軍一作厚運賊之羽毛終制死

命故其係頸求活投戈乞降崩騰於秦莽一作莽蒼之間震懾

於旌麾之下臣以其今一作雖染汙俗昔實平人推赤心以

如初敷皇一作王化而咸一作如一姚令言等力扞王師退而

復合惡鳥將墜尚顧危巢妖狐就擒猶守舊穴自卯及申

一一作自卯以及酉來拒而復攻謹譟之聲山傾而河泄鼓鞞之氣霆鬪

而電奔一作雷馳屏翳發向敵之風回祿扇燎原之焰馬逸不

止人一作士怒未舒既自北而徂南竟興屍一作尸而折首又使

決勝軍節度使工部尚書唐良臣右廂兵馬使御史大夫

趙光鏞一作書作鏞義武軍兵馬使楊萬榮左步軍使御史大

夫孟日華馬軍將田子奇霍去傲一作傲郝觀等一無華州

節度使左廂先軍兵馬使馬英華右一作先鋒兵馬使董泚華

州

州

至董泚二十三字一作華州左廂神策行營商州節度兵馬使馬英右先鋒兵馬使董珙

馬使賈慎金右廂左都虞候張望都等領馬步為副勢均

破浪攻若甚一作決河雖其盜一作武庫之五兵憑宮垣之

萬雉及茲翦滅才一作欲乘陵曾無一作鑄刃之鋒已失

藩籬之固遂生擒偽署侍中董秦中書侍郎平章事蔣鎮

左一作僕射同平章事張光晟一作兵馬使李希倩

敬缸等逆賊朱泚與同惡姚令言張芝等輕騎走出臣已

遣兵馬使田子奇等追躡計即梟一作夷臣竊以此賊苞

藏逆謀叅會凶德祲一作其氣豺武其心背先皇亭育

之恩傷陛下玄默之化漢之莽卓未足等夷晉有躬立自

當超軼子暴其父陰侵於陽自古未有如泚之大者也或

者上天之意申儆於巨唐中興之期先一作啓於陛下然

則二字一作王師奮伐一作勢無駐於建瓴醜類搶攘功

有輕於折筮猶慙一作密網尚反隻輪誠當盡敵之時更

發追亡之騎且稽分體未即燃臍使億兆之歡心復一作

宗社之深耻即當梟戮用申刑典今已肅清宮禁祗一作

謁寢園鍾簏不移廟貌如故盡為二字一作宸極之所垂祐

一作烈聖之所雄都神扶業業之傾天降穰穰之福不然

豈免於毀圯之患崩剝之虞者哉此皆上天降鑒眷慮潛

一作施制兵要於事先規雄武一作於勢內再造可封之

俗因橐不戰之弓左武右文銷鋒鑄鏑澹乎華胥之代一作

冥一作然葛天之風臣謬寄台司幸當統帥之吉甫之文

武缺卻縠之詩書此皆諸將叶心群帥宣力非臣庸瑣敢

自矜大臣不勝慶使之極謹差監軍使王敬親牙官御史

大夫符郡王邵張少引謹奉露布以聞

一作皆唐文粹

文苑英華卷第六百四十八登仕郎胡柯鄉貢進士彭翥夏校正

文苑英華卷第六百四十九

彈文

彈文

彈賈執傳湛文一首

彈張瑾將軍等文一首

彈李子和將軍文一首

為御史彈尚書某人入朝不敬文一首

代御史王師旦彈莒國公唐儉文一首

彈劔南東川節度使嚴礪文一首

彈賈執傳湛文

梁大同中

劉孝儀

長兼御史中丞劉孝儀稽首言南康嗣王府行參軍知譜
事賈執與前中書舍人傳湛在王座飲酒時上不安人從
臺還聖體已和湛乃揚眉瞋目謂執曰卿念天子我不見
關出悖慢言語連及於上共執忿諍湛昔經殺牛誤父自
殺近効貪殘賄賂狼籍特逢解網宥其餘命自被棄廢尤

四九三

一

太

懷怨憤謗訕不遜謹按前兼通事舍人臣傳湛才薄一作薄
駑蹇特荷抽擢自預左右頻蹈極刑狎對鞫書累逢關過
未聞報効反懷恚憤聖體不安臣下憂懼而湛敢生怨望
輕肆慢辭醜爭及父心無愛敬戲語連上罪同悖逆未央
馬瘦不覩廐令之忠甘泉道蕪遽見扶風之罪宜其徇乎
東市尸彼轂門南康嗣王府參軍臣賈執始聞湛語初無
逐雀之心末因私忿追顯懷鳩之逆雖迹似折莛意由肆
憾惡慢於人自彰穢醜見辱父子已會季倫之辭爭及其
公復入梁蚡之難一作難足使王媼悲於連累黑要喜於得
用太子舍人始興蕃王臣蕭毅幸因祉祚爵預藩屏而散
金失所設醴乖人雍容之賓未遊於雕苑號怒之客日醉
於雷池致使博徒跣弛慢醉盈路醜顏受辱曾無發糾
並恕伯厚之心俱鳴路粹之責臣等參議請以見事依

法免毅所居官解執知譜事請議貶黜付之卿論不得廁預官流刺尚施行輒不禁止

彈張瑾將軍等文

杜正倫

臣聞陳力就列不能者止鍾鳴漏盡夜行宜息故張良多病辭少傳而專導養壽賢告老謝丞相而乞骸骨豈惟體非筋力不可疲殆從政抑亦情重謙退欲以庶讓弘道自時積亂離久習澆弊仁義之化忽之其若遺名利所存苟得而無耻今四海乂安群生樂業陛下思治之情勞於寤寐臣謂欲防其末先正其本若庶耻之教不行則升平之化無自謹按瑾等理治之教義多罕稱出身事主行能蕪闕年方壯也尚不如人耄又及之無能為矣張瑾拔跡行陣素無才略自歸聖朝惣兵一作總過任子王之戰頻有喪師須賈之髮未足論罪朝廷假以餘年不寘於法陛下再造

五五三

文六百零九

二

大

天地更施雲雨瑾等並以齒髮流恩遂使名器踰量特進之號擬跡竇周公冠軍之名連衡霍去病既年在遲暮智乏老成宜思靜退自安止足而外託闕庭之戀內希筐篚之恩牽力衰朽強顏預朝一作預朝強一作強陛下仁愛之心形容於萬物以其不堪侍立特於廊下賜坐叨榮自若聞寵不驚貪競之志更深覲目一作目之顏逾厚臣聞設法訓人在弘其教引年敬老終取於賢寧有庸庸之流諄諄若是而可均彼上庠忝茲厚秩且名曰人臣事乖朝列養非貴德坐異論道縱慶雲之惠不別荆棘闕恩傷教其如禮何臣以庸才謬當朝寄風俗未清實任其咎瑾等爵秩既隆虧損尤大釋此不問安事狐狸激貪止競宜從隗始儻天地含容未至一作忍屏黜請斥放之罷歸里第且七十致仕古今通規近代以來貪競不息臣隨即舉劾恐陷罪者多內外

諸司有如此比散下知之使遵節制四維以張彝倫式叙

彈李子和將軍文

前人

臣某言臣聞同陰以息分路尚有悽然向隅成悲滿堂猶
兵不樂況天倫長逝伉儷不終共被同車之歡遂隔今古
撫存悼亡之痛有傷心目而可譬孔懷於行路忽齊體於
泉壤對凶筵而奏艷妓悅新寵而忘舊哀此實名教所不
容人倫之尤蠹者也謹案子和一介庸流百行兼闕階緣
際會叨濫恩榮乃分建茅社叅掌禁衛厠跡周行有年歲
矣縱前賢之行未識思齊而先王之禮宜其企及寧有弟
喪妻殞纔逾十旬子哭父歌遂同一日身被子高之縷室
對安仁之輦隣春不相而家妓畢陳節物共時而悲忻相
對傷風損教莫之為甚何可視息人閒叅預朝列雖自節
已下無足致譏而告朔餼羊實愛其禮陛下勤求治理崇
獎教義欲使習弊之人變於其道但子和器識庸下所傷
尤大若準常科則免而無耻請特加貶以敦禮教謹奏

為奚御史彈尚書某人入朝不敬文

陳子良

臣聞孝愛資於事父忠敬盡於事君淑慎爾儀不憊于位
聿修厥德無忝所生苟虧格言必貽明罰竊見某甲出自
庸微素無才術幸以運逢義始早預周行佐命之勞已酬
爵土攀附之寵復典樞機擢自芻蕘功歸聖德昔晉榮八
座蔡謨始漸斯宮漢貴五曹鄭均才沾此秩況某方圓無
取叨據非宜而覆餗之譏於焉已及歌器之誠如何遂盈
不能翼翼在公兢兢從政及復入朝散誕無鞠躬之容陪
軒慢懈之虔恭之禮有一於此身名何實臣雖凡品職當
糾察既覩相鼠之儀敢忘逐雀之志若斯風不黜方紊大
猷宜正刑書以彰朝典請以某見事付大理治罪謹言

代御史王師旦彈莒國公唐儉文

許敬宗

臣聞古人莅職不膳池魚前良罷官尚留家犢技園葵而自潔垂往哲之通規飲吳水而齊清標曩代之遺則若乃營求不已貪猥無厭徇私利而黷官方挾朝權而侮天憲有一於此必寘明科風聞唐儉往任尚書之日付託前鹽州刺史張巨令舊唐書作臣合遣錄事叅軍張正表元大節等專令檢校牧放私羊所判文書自去檢示約束剪毛之貨易州僚判署潛立公文市司勘估一同官案并有放羊入康莫賀咄所署文牒共稱牧長依問巡察使楊暮狀與新聲秩一作所聲扶同謹案前民部尚書光祿大夫莒國公唐儉門資斗食器劣餅筭在勢為優唯聞酒德座一作席賓常滿無匪博徒以逐兔之微庸屬鳳翔之興運功未叅於執帛賞已茂於相圭効無補於經綸位乃隆於常伯由是越自

李本

文苑英華四百四十九

四

木

泥滓超驥雲漢甲第高門與灌絳而並列朱輪翠蓋共吳鄧以齊驅寵出勲前化家開國任居才表揮翼在梁灑膽墮肝未荅謬官之刺驛竟飛鬼豈謝匪服之榮反復乘此恩波肆其溪壑之性憑茲惠渥縱其姦慝之心敢以私產託于州將芻豢交易並立案於曹司牧圉家童咸假署於名級情包僭擬家有擅除以此論憊深驚視聽稽諸往冊國有常科其鹽州刺史張巨令昔在剖符寵膺繁露趨其勢位擅役官寮資給貪夫成其敗類順行私令汨亂天綱請皆付法以清攸斃無任嫉惡之至謹奉白簡以聞

彈劾南東川節度觀察處置等使嚴礪文

元稹時任劾南東川詳覆使

故劔南東川節度觀察處置等使嚴礪在任日擅籍没管內將士官吏百姓及前資寄住等莊宅奴婢等并集作今於兩稅外加徵集作配錢米及草等謹件如後

嚴礪擅籍沒管內將士官吏百姓及前資寄住塗山甫等八十八戶莊宅共一百二十二所奴婢共二十七人並在諸州項內分析

右臣伏準前後制勅令出使御史所在訪察不法具狀奏聞臣昨奉三月一日勅令往劔南東川詳覆瀘川監官任敬仲贓犯於彼訪聞嚴礪在任之日擅籍沒前件莊宅奴婢等至今月十七日詳覆事畢追得所沒莊宅奴婢文案及執行案典耿瑀馬元亮等檢勘得實據嚴礪元和二年正月十八日舉牒去集作管內諸州應經逆賊劉闢重圍內并賊軍到處所有應接及投事西川軍將州縣官所由典正前資寄住等所犯雖該集作需澤莊田須有所歸其有莊田奴婢桑柘錢物斛斛邸店碾碓等悉皆搜檢勘得塗山甫等八十八戶案內並不經驗問虛實亦不具事賊

五奎

文苑六百四十九

五

袁本

職名便收家產沒官其時都不聞奏所有

集作

資財奴婢

悉皆貨賣破用及配充作坊驅使其莊宅桑田元和二年

三年租課嚴礪並已徵收支用訖臣伏準元和元年十月五日制西川諸州諸鎮刺史大將及參佐官吏將健百姓等應被脅從捕署職官集作一切不問又準元和二年正

月三日赦文自今日已前大

集作

逆緣坐並與洗滌況前

件人等悉是東川將吏百姓及寄住衣冠與賊集作黨素

無管屬賊軍奄至暫被脅從狂寇既平再蒙恩蕩嚴礪公

違詔命苟利資財擅破八十餘家曾無一字聞奏豈惟剥下實謂欺天其莊宅等至今見被使司收管臣訪聞本主並在側近控告無路漸至流亡伏乞聖慈勒本道長吏及

諸州刺史招葺集作

緝

疲人一切却還產業庶使孤窮有託編

戶再安其本判官及所管刺史仍乞重加貶責以懲集作絕

姦欺

嚴礪又於管內諸州元和二年兩稅錢外加配百姓草共四十一萬四千八百六十七束每束重一十一斤

右臣伏準前後制勅及每歲旨條兩稅留州留使錢外加

率一錢一物州縣長吏並同枉法計贓仍令出使御史訪

察聞奏又準元和三年赦文大辟罪已下咸蒙恩蕩唯官

典犯贓不在此例臣又集作聞嚴礪加配前件草準前月

日追得文案及執行案典姚孚檢勘得實據嚴礪元和二

年七月二十一日舉牒稱管內郵驛要草於諸州秋稅錢

上海貫加配一束至三年秋稅又準前加配計當上件草

臣伏準每年旨條館驛並集作有正料不合於兩稅錢外

擅有加徵況嚴礪元和三年舉牒已云準二年舊例徵收

必恐自此相承永使集作疲人重困伏乞勒本道長吏嚴

加禁斷本判官及刺史等仍集作乞準前科責以息誅求

嚴礪又於梓遂兩州元和二年兩稅外加徵錢共七千貫

文米共五千石

五四二

文苑六百四十九

六

大

右臣伏準前月日追得文案及執行案典趙明志勘驗集

勘得實據嚴礪元和二年六月舉牒稱綿劍兩州供元和

元年北軍頓遞費用倍多量於梓遂兩州秋稅外加配上

件錢米添填綿劍兩州頓遞費用者臣又牒勘綿州得勘

報稱元和二年軍資錢米悉準舊額徵收盡送使訖並不

曾交領得梓遂兩等集作州錢米添填頓遞亦無可集作折

當州錢米處者臣又牒勘劍州得報稱元和元年所供頓

遞侵用百姓腹內二兩集作年夏稅錢四千二十三貫三文

使司令於其年軍資錢內尅下訖其米即用元和元年米

充並不侵用二年軍資錢米數使司亦不曾交集作梓州

遂州米充填者臣伏念綿劍兩州供頓自合準制集作優

矜梓遂百姓何辜擅令倍出租賦況所徵錢米數內準集作

剋下劍州軍資錢四千二十三貫三文其餘錢及米並是

嚴礪加徵別有支用其本判官及梓州遂州刺史悉合科處

以例將來擅收沒塗山甫等莊宅奴婢及於兩稅外加配錢

米草等本判官及諸州刺史名銜并所收色目謹具如後

擅收沒奴婢莊宅等元舉牒判官度支副使檢校尚書

刑部員外郎兼侍御史賜緋魚袋崔延

都計諸州擅沒莊共六十三所宅四十八所奴一十

人婢一十七人

於管內諸州元和二年秋稅錢外隨貫加配草元舉牒

判官觀察判官殿中侍御史內供奉盧詡

都計諸州共加配草四十一萬四千八百六十七束

文苑六百四十九

文苑六百四十九

七

大

加徵梓遂兩州元和二年秋稅外錢及米元舉牒判官

攝節度判官監察御史裏行裴洌

計兩州加徵錢共七千貫文米共五千石

梓州刺史檢校尚書左僕射兼御史大夫嚴礪元和四

年三月八日身亡

擅收塗山甫等莊二十九所宅四十一所奴九人婢

一十七人加徵錢三千貫文米二千石草七萬五千

九百五十二束元和二年三年四年萬四千一百六十二束

遂州刺史柳蒙英華作蒙

擅收沒李簡等莊八所宅四所奴一人加徵錢四千

貫文米三千石草四萬九千五百三十五束元和二年

四千五百三束元和三年二萬五千四百八十二束

綿州刺史陶錕

擅收沒文懷進等庄二十所定十三所加徵草八萬
八千六百八十八束 元和二年三萬八千九十三束
元和三年五萬五百九十五束

劍州刺史崔心具成 元和二年十一月五日
改授邛州刺史

擅收沒鄧琮等庄六所加徵草二萬一千八百七十
七束 元和二年九千七百七十八束
元和三年

普州刺史李愆

元和二年加徵草六千束三年加徵草九千四百五
十束

合州刺史張平

元和二年加配草三千四百六十二束三年加徵草
五千六百五束

渝州刺史邵膺

元和二年加徵草二千六百一十四束三年加徵草

三七六

文苑六百四十九

八

乘

三千七百二十七束

榮州刺史陳當

元和二年加徵草九千四百三束三年加徵草五千
四百二十七束

瀘州刺史兼御史劉文翼

元和二年加徵草三千八百五十三束三年加徵草
三千八百五十一束

資州元和二年加徵草一萬五千七百九十八束三年
一萬六千二百二十五束

簡州元和二年加徵草二萬四千一百四束三年二萬
三千一百一十八束

陵州元和二年加徵草二萬四千六百六束三年二萬
三千八百六十一束

龍州元和二年加徵草八百九十一束三年八百一十一

一束

右已上本判官及刺史等名銜并所徵收名目謹具如前
其資簡等四州刺史或緣割屬西川或緣停替遷授伏乞
委本道長史各據徵收年月具勘名銜聞奏

以前件狀如前伏以聖慈軫念切在蒼生臨御五年三布
赦令殷勤曉諭優在集作惠困窮似涉擾人頻加禁斷況嚴

礪本是梓州百姓素無藝集作才行可稱久在兵間過蒙集作於

獎拔陛下錄其末集作微効移鎮東川仗節還鄉寵光無比

固合撫綏士集作黎廢上副天心蠲減征徭內榮鄉里而乃

橫徵暴賦不奉典常擅破人家自豐私室訪聞管內產集作示

阡陌相連僮僕資財動以萬計集作則一作集作沒身謝咎而猶

遺患在人謂宜謚以醜名削其褒贈用懲不法以警將來

其本判官及諸州刺史等或苟務容軀競謀侵削或分憂

列郡莫顧詔條但授節將指揮不懼朝廷典憲共為蒙蔽

皆合痛繩臣職在觸邪不勝其憤謹錄奏聞伏聽集作候勅旨

文苑英華卷第六百四十九

登仕郎胡 柯 鄉貢進士彭 叔夏 校正

文苑英華卷第六百五十

移文一卷

移文

此卷英華所編失年代先後全正之

移虜淮陽太守文

為侯景叛移梁朝文

為東魏與梁請和移文

梁報東魏移文

答魏初和移文

移齊河陽執事文二首

移虜留使文

移虜淮陽太守文

永明十年太歲某淮陰太守某移淮陽長大齊乘軋得一
清寧今皇上體聖居震纘戎昌緒仁澤之所灑露惠風之
所偃靡威武之所勝疑作騰驤刑政之所宣暢浩浩乎其不可涯
涘固能徼岷禺關夷海拓沙渚道零山八流承嗣九垓禔
福含齒戴髮其樂只且所以通歡魏境靜息邊民嗟爾黔
氓共知優忝而魏主不篤我信誓侮弱我慈懷憑陵我

四十三

進

城寇擾我樊鄧元帥逞梟鳥之心銳卒畜蜂蠆之毒蠅飛
藩棘蟻附池隍我聊命偏將執而俘之連左袵於郊門頓
編首於外闕有司將加誅焉天子弗之許也重謁而請天
子又不許也更從請所以置之乃制詔曰昔虞帝欽明苗
山記倒戈之陣夏軍踵武鈞臺載不戰之兵今鋒鏑陵邊
彤雲入候加討而後擒待征而知服此迺朕之涼德彼將
何德徒哀其積習為性因染遂變一作惑不識天時用干人
事雖同濱率境自隔王臣直曰斯民獨為係虜父母生乖
妻兒疑作則疑作桑梓悠悠墳塋萬里情甚悲之可解網改祝
聽歸巢穴豈直隣好足鄙國特以哀矜自中以時資遣稱朕
意焉已遵明詔部送所虜若干人即日在界且速近護時
施故堡使幽荒之外知皇王之德音故移

為侯景叛移梁朝文

魏收

夫化成萬物分界九道紀之以山河照之以日月方足圓
首含器呈形咸物之於聖人畢會之以朝市皇魏應銜甲
之祕圖納封金之寶命萬方爲宅四海爲家卜世靈長將
踰八百年壤之間朝不別焉唯夫三江五湖九蠻百濮其
地如掌人鳥未分瞻星昧環拱之方託水迷朝宗之義積
蠅爲衆長蛇稱長石田無菽粟之用衆人非聲教所孚是
以年歷三僞棄而不有豈力不足蓋所未徵而陸梁塗泥
時軼疆鄙天討所遺理存惡殺自二紀及茲中原多故未
清區宇文武兼勤偃伯歸戰有懷勞止將令動植俱仰堯
心遂冠蓋括途象胥提告推誠蹶然類識王道授衣禮一作
節拜首歸仁舞戚所以爲高止戈故能稱大方知風沙交
臂不待兵車有苗納款未勞征伐而庸夫爲善希能令終
狂人克念更知徒語聞利無匹夫之信好虐有助鬼之心

事十六

文苑亦百五十一

二

准

白頭爲賊酋莫自揆嘉聞浮功甘於苟得罔顧榆次之禍
詎識江浦之禽侯景一豎微蔑民斯下矣人倫士操本自
不倫直以少從羈勒顏習趨走叨忝名器事出爾朱藏
情諂笑唯利是視義兵同舉羣胡覆族雖斂祭首丘事
非小人而忘恩背本景爲先至不義不信自此可知但
丁公之戮時有未可也大澤深山龍蛇並育遂容其悔非
棄其瑕穢任一作以將率授以兵符庶其被鞍銜鑣盡力
馳驟指蹤投縶驚兔或擒而弱才負重折足是慮置之不
爭之地虛出韓鄭之間曾無戰伐之勤可言摧陷之績歲
往年徂卒無可紀而腹心羣小信納逋亡劫奪行道侵掠
民庶流聲遠聞王法有典驄馬將出朱筆且行自貽伊戚
了不知咎盜憎主人乃圖逆節拔本塞源以疑委身賊虜迫
脅居民翻蕩城池义手曲躬千里唯諾殘賊相依忻同鱗

水寵以大位屬以東方外曰臣主內深骨肉安危契闊約以死生拯其鼎鑊之命全其齏粉之禍時不暇浹翻然易慮還相掩擊事劇仇讎反覆剽獲莫非此類至於老母暮倚少弟升岡妻望行夫子號出父食毛之屬可爲心哉景忽之如草芥棄之如塵垢任其斲截之誅安其烹斬之痛放麇食子有以可親觀臧窮否耻其並主獸心人面華裔同讎歸家懼執法之刑赴賊反噬臍之豐首領無地進退數窮遂卑邪說自託左右苟有君子義均逐雀而彼方上下樂禍好亂叛竊之豎獲毒之人圖浮芥之小利忘丘山之大禍乃崇飾土偶被以玄黃馳馬高蓋載懸爲重委以專征施其爪角驅逼子姓率我叛亡迫厭虐之侶鞠苦役之衆蟻攢蚋集侵竊邊鄙恤患分災本不要於夷僻違衆悖禮蓋神明之所誅皇帝垂旒華土則天而動卷覆三

五十七

卷之六十五

三

進

古懷佩百王掌握中道崇基增構殊塗同會百慮一歸中外提福戎華俱庇持秋霜夏震之威以拔山超海之力顧指則風雲物至迴眸而山岳削平雖復旗鼓所臨有征無戰猶以師出而服辱在我世所務者息民所存者文德豈復以擒將威敵漂杵溺駮爲功於一時示武於二載但天生五材有聞前古禍非我胎其得已乎遂置壇命將持柯畢禮引筥就道分途競馳批熊舉輪之士翹關扛鼎之卒被組橫矛執爨挺劍龍駒並躍驪子千羣沸聒天壤蒸鬱雲霄一朝指揮倏忽千里候騎羅旆柳暹前驅天兵之鼓禾鳴衆軍之旗詎接而荆揚烏合一朝崩解塞川滿野馘耳截臍以千萬計不可勝數宗親節將咸見擒束委命軍吏憂在豐鼓楚兵吳甲積若山丘青雀赤烏噎流斷岸千金之貴爲我資焉痛辱可哀其利安在覆師喪旅禍本可

尋方之噬臍悔之靡及皆侯景叛戾虛相陷誘指成提挈
之舉終無掎角之勢景棄本趨末背國違鄉部下數千屈
迫羅網離親懷土一日三秋拘網立瓠朝不謀夕豈能搖
足東上遠赴彭城天奪彼魄信納虛詭使蕭明貴孫面縛
於徐泗景爲凶數逡巡而坐觀託人七尺之身居人成敗
之地急病讓夷固若此也兩端自見故態未除今知東南
滌盪睢潼清復梁之喪師單輪不返繫援之期終當無日
勢窮路盡憂在滅亡事留變生將謀及已且彼軍殲殄江
淮屠酷禍源豐迹景變疑作實爲之上懼金陵君長致請設二字疑
之責下恐荆吳子弟法疑父兄之冤愚小猜驚將興異計乘
專任之機藉方面之重必當招結僮楚扇合無賴內自封
殖外絕防禦因見信而類起出不疑以竊發事比疾雷理
同激矢上或憑陵乘一作建疾專擅縱橫下則鷓峙淮肥覲

五八甲

齊北六百五

甲

覲叛換老賊姦回不虛然也而彼土區區厚加崇納置之
襟帶之方處以藩籬之所費金帛於烈火罄酒漿於漏卮
非乘景虛聲委其變疑作實用夫量材授任必源其始考行
責成當存其大景豺聲蜂目之首狼心狐魅之徒義無父
子弃同即異捐親背德於我尚反目而去在梁則何施可
懷且我疑重傷心尾大不掉魚脫於淵義彰老氏而假威凶
險授柄姦回欲求肝膽之誠更啓危亡之兆固智者不爲
迷者遂去若抽薪止沸剪草除根壺首囊頭义手械足返
國姦於司敗歸侵地於玄武非直惡之在今天道人事實
弃無禮苟達一作違之者其長世何若悔非知罪恭承德音
且欲飛駟合符班師凱入悠悠水鄉有救其死若乃執飾
非之辨固遂過之失便當盡常勝之戰極必取之攻飛江
南度浮山將恐削壤卑名雖頓顙而不獲亡宗滅廟望喬

木而可悲昔田假英人於期壯一作壯士窮而歸我許以入懷
景踈恃狗子攬亂四國庸可紓難奔若孤鷁何足戀戀於
亂臣勤勤於賊子也王者之威心一作厲厲如霜電信同寒暑言
猶麗天移至深念變通孰量可否幸思大雅無貽後悔

為東魏與梁請和移文

元世俊

侍中大驃騎同尚書令武陽子元世俊移梁執事乃眷江
漢襟帶南土疆場相望交錯如繡輜軒未通革車屬起一
彼一此或利或鈍亡載得輿所獲蓋寡爭鷄失牛所損更
大空使干戈未一作不戢戎馬生郊髓腦塗於原野骸骨暴
於草澤二國不和百姓何罪靜言思之良所未悟我皇帝
以聖明啓運禮樂惟新澤漏淵泉道光日月方欲寢榆闢
之高烽罷輪臺之遠戍鑄劍戟為農器納蒼生於仁壽而
前益州刺史傅和往處西蕃逢時多難歸途多一作中阻流
寓江濱亦既來朝具陳彼意知以止戈在念去殺為心留
情灌瓜遲存通樂風期所望實協虛想一作心猶恐失詞或
乖其實眷言在茲佇聞良信至彼假節開遠軍李稜昔經
垂翅遂掛天網矜是南冠捨之還故因其致書用宣朝旨
若覆前言共勦隣好當拂逆旅以待行人

梁報東魏移文

何敬容

侍中宣惠將軍尚書左僕射何敬容報魏執事成湯二十
七征志唯靜難軒轅五十二戰義在拯民既異時而同致
信殊政而一揆豈其黷武以窮兵寧為仗威而尊大我皇
帝降茲仁一作上聖承彼百王負宸君臨不以四海為貴冕
旒日具常以百姓為心同二儀以覆載一六合而光宅德
踰羲昊道邁唐虞諒開闢之一君信典謨而莫擬均心彼
我等悅怨親物有常懷人無異念自北國紛擾河洛沸騰

牝鷄索家蕭牆起釁事以疑作譚尚義以疑類闕沉立兒一作尋
干戈民無定主侯馬泣師月陳庭廐果糧請救日填闕下單
民有微禹之望遺黎與後后之悲誠感仁恕理惻皇慈任
好瓌瓌納二晉君小白區區存三亡國況我朝廷寧忘拯
救是以命師薄伐至于伊川雲旗屢張非為翫武鉦鼓載
陳豈衒威力湯伐不祀周有義兵疋夫是讎尺土非利百
戰百勝非善之善九拒九攻終勞率土納隍之慮無忘寢
食李稜失律摧一作隨身晉陽獲彼來移聞見委曲知魏當
璧得主龜兆有人作相惟賢棟梁克一作充室欲偃兵戈式
躬隣好九臯既響嗾天已聞銅山一啓靈鍾斯應矧乃出
其言善千里莫違嘉言孔昭良以攸納且敵怨敵惠不在
後嗣亡羊補牢亦所未失移至之日輒以奏聞即蒙詔可
不爽來意行符一作等緣邊偃兵解甲庶烽一作燧火不警邊

五五十八

文苑

六

進

亭息候征夫捨刁斗之勤處婦無憤望之至尋常不爭農
桑是務分災恤患繼好息民稜在北歲久情無疑難還使
賚移報彼來懷

答魏初和移文

任孝恭

蓋聞軒轅五十二戰義在拯民湯武二十七征本惟靜難

明異時而回致信殊政而一揆我皇帝屈茲上聖承彼百

王卷六合而包容弘二儀而覆載照高日月澤畜一作富雲

雨值魏氏紛綸亟離星晷競尋干戈爭以興發一作廢王無

卒歲相不決辰隻馬泣師月陳庭闕裏糧請救日款關扉

故屢動震一作雲旗再驅蒼兕同小白之存亡等任好之繼

絕疋婦是讎尺土非利然百戰百勝猶苦四民九拒九攻

終勞百姓納隍之念無忘日昊李稜以失律暫摧鱗羽同

孟明之返秦似荀瑩之歸晉少展一作并賚來移聞之委曲知

彼當塵得人非龜有王欲復與式斯雅好鶴鳴九皋啖

天已響自出其言善良以欣然輒勒緣邊屯戍各息烽警言旌

旗畫捲刁斗夜停混鷄犬於四隣接桑麻於二境一作皆藝文類聚

右一篇大同上異前篇加詳後篇見藝文類聚今

英華並收不欲去取內有同處止於後篇作白字

移齊河陽執事文

庾信

周天和四年四月二十七日使持節車騎大將軍儀同三司大都督陝州物管府移齊河陽執事自疆場卧鼓邊鄙收烽義讓之行未能暮月孔誠誨盜即值苞藏是以板載之師書時而動自安封域非求拒防雖復風塵暫是接旗鼓無侵五將即迴雙嶠已靜始奉朝旨獲被彼一作移書令受叛城使迴軍實想彼邊司又應已奉處分既有此還輒須領納未知何日可遣戍兵指附行人遲能速報盟且丁偷隣境相善顧瞻原野幸甚實多故移

同前

前人

周天和四年十一月十日陝州物管長史梁昕移齊河陽執事自拭玉繼書通關去傳實謂上方銷劍山陽息馬故茲禦容或慢重局屬彼司疆陰行善盜君一臣二上穆下乖國家以邊鄙心搖須固備守大司馬齊國公天子介弟中軍元帥駕馭孫兵驅馳貔虎舉因農隙義異城郎師巡我境曾非反軼縮載之畢前旌已迴彼國兵馬不防殿後餘塵遂之相接建旌一作忠壘上未及五申安鄴城傍先驚七伏當時鋒刃或膏原野所獲彼將夏州刺史梁老首領今以相還尸鄉不遠無令久客馬驢甲兵具條相勒封人宜依領納宿無鬪志不獲交綏致此埃塵誰階其咎故移

移虜留使文

年月朔日某官告配某州郡前本欲發遣彼使但某入境
以來國祥甫邇自秋迄冬未申款接且狼星表邦嚴霜以
戒浮河亂濟長路苦寒時當獻歲惟新三元告慶珪瓊盈
庭華喬參軫式觀盛禮洽此嘉謹陽和既動澤漸萬邦便
當遣使相隨永斯隣睦故移

文苑英華卷第六百五十

登仕郎胡 柯 鄉貢進士彭 叔夏 校正



